


郭泰
給諫疏稿
錄







郭給諫疏稿

郭尙賓撰

編主五雲王

編初成集書叢

種一他其及稿疏諫給郭

中華民國二十五年六月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

張

郭給諫疏稿序

余不佞承乏金川。逾六年。以量移去。適今疆吾郭先生。奉命來理吉州。吉轄寥曠。金川亦在鄰屬。稱難治云。嗣是不佞牛馬王程。往來吉疆。備聞郭先生治行。大都問民疾苦。諸所不便。輒白當事報罷。利輒興之。兩造之詞。剖判曲直。如分白黑。郡有大獄。苟得其情。雖犯當事之所顧忌。與夫鄉紳有力所關說。屹然不爲動色。人曰。江山可移。金石可銷。而不易郭君之一諾。異日立殿陛之間。與天子爭是非。與百執事決可否。豈異人任也。余今讀給諫所爲疏草。不憚權倖。不避忌諱。見無禮於君者。不啻鷹鷂之逐鳥雀。於一人之失用。一政之錯行。篇中每三致意焉。轉圜之聽。雖未能遽必於上。而宸聰遐覽。精忠可格。亦必隱隱有功於中。如言福藩王之國如期。言彙臣楚宗。竟釋彙臣而寬楚宗。言權稅中使。竟減額三之一。而停東粵稅使。言枚卜及處分大僚。竟點用新輔。而分別被論諸臣。以了計局。此豈聖心自爲轉移哉。然後知子與氏人不足適。政不足間。非定論也。古人所謂爭天子是非。決百執事可否者。信矣。昔韓魏公濟大事。以膽司馬公以誠。范文正公以曲盡人情。給諫合數者而出之。而一本於至誠。誠故不欺。而犯也不難矣。雖然。給諫今日言之。未必廟堂之上盡行之。異日給諫陟銓衡。司政柄。自給諫言之。亦自給諫行之矣。請書之以爲左券。

欽差巡按直隸南京山東道監察御史眷友弟曾陳易頓首拜書

郭給諫疏稿卷一

南海 郭尙賓 朝諤撰

題爲天氣炎蒸囚禁殊苦懇乞聖明卽傳熱審矜恤并超釋繫臣楚宗以明朝廷法無終誤以慰中外臣民切望事臣查大明會典我朝熱審事例每年小滿後十餘日司禮監傳旨下刑部卽會同都察院錦衣衛覆將節年欽恤事宜題請通行南京法司一體照例審擬具奏是熱審之旨傳自內廷刑部隨奉而行之不俟臣下頻請也傳旨之期乃在小滿後十日原有定時非可任意忽忘也今小滿已過而夏至又過矣審旨未聞是以臣等有公疏之請請而卽得則祖宗之舊章未背恩恤之及囚不遲請而未卽得如舊年遲至八月初二則各囚雖有終被之恩畢竟多此數月之苦且於祖制謂何聖朝仁政謂何目今日烈日長如煎如炙暑雨蒸溼疫疾易生隨其罪比之所麗衡其恤恩之所可施予各囚以炎歊之清冷兩月恩例蘇救實多臣故以爲熱審之旨斷宜日下沛發也遇熱而審審不踰期矜於熱審所及復矜於熱審之所不及孰有如曩臣滿朝薦王邦才卞孔時等之立當釋乎又孰有如楚宗華越英嫻等之立當釋乎夫朝薦等三臣其當日有功於地方不但舉朝之臣能言之其今日抱屈於羈繫不但舉朝之臣屢言之卽在聖心亦已明知人情之所共冤釋宥之爲仁政矣不然何舊年八月已稟擬釋放之旨也然旋稟旋置聖恩欲流而復鬱豈以三臣之懲創未極國法尙有未伸聖怒尙有未平耶臣念法司獄中卽凌遲斬

統等犯其親戚家人。尙得時覩其面。朝薦等一入詔獄。不殊。已登鬼門。家屬見面無從。閱歷歲年。惟是含
悲黑地。法司獄中。遣配杖決等犯。俱蒙隨審隨發。獄無久鞫。朝薦等未隸何條。近者錮六七年。久者錮十
餘年。此等苦毒。無可復加。乃以施之保民之吏。愛國之臣。孝親之子。如謂三臣阻撓權事。而税金至今未
損也。如謂三臣要市名譽。其剛名祇自皇上成之也。小民易虐難保。守令不可不好強項之名。以安地方。
士氣易摧難振。皇上不可不好容強項之名。以鼓舞豪傑。國家有誅殘吏之法。無錮良吏之法。三臣有可
錄之功。無可怒之事。惟天默啓聖衷。故舊年秋間。倏焉稟釋。皇上今日之心。克承天心。自洞然見三臣之
爲民父母也。國之倚仗也。有不慨然釋放耶。夫華鬻被禁。爲輕奏楚王之故也。英嫺等二十三人被禁。爲
搶槓奪銀。毆死撫臣之連坐也。以禁錮做輕奏爲當然。以久錮做輕奏爲已甚。爲叛逆之從其情重。爲劫
殺之從其情輕。今華鬻禁踰十年矣。以瑕釁奏。奏旣不行。以誣服錮。錮胡可久。矯其已甚。卽行疎釋可也。
英嫺等情非叛逆。近日朝士。已連章代明。則當日叢搶雖衆。聚毆雖凶。總只狂囂之狀。其罪止於搜書搜
銀。狀殺撫臣也。其論刑止當蘊銜等二三抵死也。昔刑六人。已屬太濫。尙益之以英嫺等之久禁乎。常人
毆死。爲從止於擬徒。以天潢之派。反從重典。而閩門久禁乎。此一獄也。權奸授故入之意。側媚造莫須有
之牘。倍誅倡禍者以立威。波錮從難者而不知其太過。司道爭之不能得。法令遽難平反。而姑斟酌其詞。
查題覆參看云。若止坐以劫殺之條。則吞舟不無漏網。如徑擬以叛逆之律。則出柙尙未張牙。是法司諸
臣。不過謂犯宗爲劫殺之雄桀云爾。曾是英嫺等劫殺之從。禁已九年。而猶不釋乎。宗盟誼隆。皇上親親

之念必重。乃請釋時聞。未蒙俞允。臣民私意揣度。有謂楚王從中讒沮者。臣謂楚王如果不假。如其善自爲謀。正宜代諸宗請。得出禁。則宗人自當相忘。怨讟自當寢息。不然。楚王何樂與諸宗明明相持也。此楚宗所宜亟釋也。臣自受命以來。請釋朝薦等之疏。不憚再三。今隨諸臣之後。并請亟釋楚宗。蓋臣科與刑部。都察院。大理寺。俱有刑名職掌。如疊臣楚宗。一日不釋。則刑罰不中之失在皇上。如臣科不爭。部與院寺不爭。則皇上之失刑。其咎全在部。院。寺。科矣。故使疊臣楚宗。以不爭問臣。臣猶可以天聽之高爲解。若皇上以緘口遂過責臣。臣無所逃罪矣。故敢喋喋以請也。抑臣猶有說焉。囚在獄中。以日爲歲。望釋望減。如炎祈陰。慮囚之吏。豈無人心。何忍其苦滯圓土也。庚戌差出各省恤刑。辛亥各有恤疏。題請裁奪。得旨下部。乃有已經年餘。部司不速爲題覆者。是恤臣急於矜宥。部司緩於覆章。罔顧待命之囚。互滋推玩之習。合無自今以後。旨下五日不發抄。罪在臣科。該部半年不題覆。罪在該司。庶幾覆有常期。囚速蒙惠也。若夫僻藩郡邑。訟牘盈庭。事不問重輕。贖不問徒杖。概將羈之禁中。彼佐領小官。亦效尤而發監。惟意不聞守令立法清省。聽其監舍充盈。甚至有十年訪犯。猶然監未審發。以贖徒贖杖不完。竟斃之禁中者。嗟。嗟。省事莫若省訟。恤民宜先清監。審發何爲而稽時。民命非輕。於贖錢佐領。濫禁而不之問。守令豈真塞聰掩明也。夫輦轂藩國。囚異而望恩之心同。廷官外吏。職異而矜囚布德之責同。今皇上一行赦過宥罪之仁。中外臣工。誰不望風承指者。故卽傳熱審。以舉其至急。卽釋疊臣楚宗。以舉其至大。此皇上所宜不再計而決者也。由是限定題覆恤疏之期。由是申嚴郡邑濫監之禁。將臣工凜凜奉法。各毋傷生命。以干

天地之和。不過皇上一動念而足矣。不猶陽和一嘘而草木夭喬。無不各遂其生哉。臣可勝惓惓祈懇之至。

萬歷四十一年五月初十日

題爲不法邪弁交結內官。夤緣委奏。蔑能採之恩綸。恣斯君殃民之大惡。懇乞逮問正法。以安生靈事。臣查萬歷三十三年十二月十五日。元孫誕生。恩詔內一款。珠池採取多年。不宜竭澤。詔到之日。卽使封閉。原差內官李敬。馳驛回京。原衙門應役。欽此。洋洋詔旨。今尙□□□後世。法程至明也。乃近日道路相傳。有謂金吾右衛左所指揮倪英。上疏請開珠池。愚臣未之目擊。未敢信以爲然。使果有之。本弁何其敢於違背詔旨。不將順皇上賤異物德意。乃以生事擾民之失。導朝廷哉。臣考大明會典。參之廣東通志。於珠池之採。俱未列爲常時難缺之課。而能採遣內臣已事。則紀載歷歷甚明。如洪武七年。罷採。以官兵取珠大海。四月至八月。止得珠半斤也。永樂十三年。罷採。以千戶徐斌。竊取珠螺。罷之以禁竊採。宏治七年。差太監一員。看守楊梅等池。後尋取回也。嘉靖八年。提督兩廣侍郎林富。奏稱往者採珠。說者謂以命易珠。今卽易以命。恐亦難得。其詞可驚可涕。已而富疏至再。內稱所得幾何。所費萬計。得不償失。毅然請罷。肅皇帝竟從其言。而守池內臣。於是革去矣。論珠顆未見採取之贏餘。論池禁可歸海北兵巡之兼攝。內臣之罷。決之於一日。安靜之利。貽之於數十年。此果肅皇帝之能遣爲是乎。抑皇上二十七年之復遣爲是乎。李敬開採七年。其得珠不多之數。皇上能知之。乃李敬奉撤回京。其採徒糾聚未散。尙遺地方劫掠。

之患。皇上猶未知之也。蓋李敬召探之人。盡各處作奸之輩。凡集若干艦。艦各數百人。狎風濤。走死地。如鷲探。與因緣以攘利。探罷狂逞而無歸。至今盜賊充斥。近海之民。臥不安枕。夫非李敬之剝孽耶。今若復遣開探。則璫餼可畏。發戶必聞風逃匿。後來所赴開探之召者。必前日無歸爲盜之徒。璫役從中蒙蔽。璫烏知之。是鳩千萬狂逞。糾集於池之內外也。盜不能散而使聚。遣璫之長。覈若此。失一中官一操事權。剝取事知屬。壓所至。虐郵官。虐郵役。折夫折馬。不遂不休。是郵舍添一陷阱也。以棍徒爲爪牙。以盜取池珠爲名目。訪拿平民。嚇取財物。必罄其家而後止。凡有池無池地方。雞犬無復得寧。是民間添一豺虎也。夫不能蘇郵傳地方之苦。反增之累焉。失二中官得差遠藩。如虎出柙。其生平目不知書。既不可以禮義責之。而遠在萬里。又誰以法紀繩之。銜命擁尊。於兩院方面大吏。俱得分庭抗禮。一遇州縣各官。必將倨傲恣睢。彼各官受職朝廷。誰能容貂璫無禮者。若城市小民。其受璫役魚肉。又可知已。夫不能重官司除蠹安民之權。反遭虐民者。往撓官司之法。失三。朝廷差一內臣。本省必爲之建衙宇。置舟車。儀仗器物。費若而金。爲之供廩薪。給牙役。并贍其隨行一二百人。又歲費若而金。凡開探所得。彼璫惟知。以自潤。其所進之皇上者。不過自誅求民間得來。又或其自潤之餘也。剖腹藏珠。自是若輩本態。第朝廷甘受貪寶之惡名。必明予中官以營私之厚利。失四。東粵歲輸監稅一十八萬。推蔽已極。脂髓無餘。欽州既中流賊。加以掩過者之荼毒。首級不盡解。解者不盡賊。妄殺極冤。宇內無兩。今貧極憤極之民。何堪再虐。且聞海東李侯翁。方蠢蠢思逞於欽州。萬一與貧窘思亂者。珠池妄逞者。響應弄兵。此時何以制之。夫不務爲安戢。

之謀。而開採以速其變。失五。五者之失。只在皇上不允開採。便自脫然無累。乃倪英之疏。一上。其大罪。蓋有三焉。夫有名爵之內。臣律禁交結也。本弁以開採請。必以堪差之內。臣請。惟平日交厚此人。所以請差此人。而犯律不顧矣。其大罪一。逢君之惡。所稱罪之大者也。本弁敢料皇上。欲在珍珠。遂敢以開採爲請。此外。可欲如珠者尙多。亦將可竊聖意。而上疏迎合矣。其大罪二。說謊者。斬。聖旨懸之禁門者也。向來開採。未聞珠顆之多。今本弁逆知粵民易虐。後來括民之積。可充上供。必於誑差疏中。請開歲。可厚獲之數。思以聳動天聽。而不顧其明明說謊矣。其大罪三。夫執一罪。已足置本弁於辟。況大罪種種。本弁要領。寧足辱皇上之斧鑕耶。罷採萃一省之歡聲。復採萃萬民之怨譟。採於既罷數十年之後。猶有咨嗟。採於纔罷數年之時。寧堪惋惜。聞本弁現向奧援之人。欲構中旨。此豈營差內官。其作用果可以移聖意耶。又豈以粵民真柔。可博璫弁彪虎之翼。聽其飛而食人耶。臣意已故之稅璫。皇上向無補差。則已罷之珠璫。皇上必無復遣。未有恩詔自出。可以自違。又未有奧援之人。敢於煬取明旨。而冒此大惡者。臣曾記先年。粵民恨稅璫之虐。又恨其途辱姚推官。一譁之於藩司署前。一譁之於其本衙門。稅璫斂息。竄免。可見粵民至柔。亦至剛也。況已貧復來漁獵。已困復來魚肉。民情事勢。未有不激而決裂者。至於決裂。璫弁之糜爛。其何足惜。但多一番闕停地方事。所失不旣大耶。勿謂臣今日不言也。當昔罷採之年。用珠固買於商。卽在李敬開採之年。用珠亦買於商。採之無濟於用。若是。乃上用珍珠。價銀在珠之外。商僅得三之一耳。其二。盡京官與皇上之左右所瓜分也。皇上能卻左右眩惑之言。專以買珠之權。付之戶部。該司聽其便宜。

參酌平買。則視昔年珠價。當減其半。開採之役。可以永議停罷。似亦利國利民之一端也。伏乞聖明垂察。天下生民疾苦。惟廣東獨甚。施恩倍加寬恤。俯納臣言。允下法司。行提倪英。及營差內臣。並置之理。以儆。臣子之罔上。謏奏者。臣愚幸甚。粵東生靈幸甚。

萬歷四十一年五月二十六日

題爲蒙赦舉人。被錮聖世。貪吏之誣陷未白。修士之沉抑堪憐。懇乞特賜矜察。准復會試。以彰仁治事。臣憶稅璫初至廣東。遣亡命爪牙。橫行郡邑。被害之民。無官可訴。束手聽命。於是不肖有司。且乘之以爲奸。黨同嚇詐。非獨魚肉小民也。且荼毒士類矣。其他不必縷指。若新會縣監。故鄉官通判吳應鴻。赦回舉人勞養魁。梁斗輝。鍾聲朝等。或死或褫。事屬極冤。臣痛切於中久矣。試言其被逮之由。則當日貪虐知縣鈕應魁所誣構也。萬歷二十八年二月。稅棍陳保。徑下新會。持一票行掣三十餘人。皆富民也。旋一日提至十二人於縣。酷刑繫獄。閩邑人心。皇皇震動矣。適繫者之里排保約地方。凡數百人。跪集縣庭。乞應魁爲之解免。奈何陳保藉縣力以提人。應魁乃濟棍惡而攫金。陳保曰。某要餽我若而金。某要餽我若而金。應魁亦曰。某要餽我若而金。某餽要我若而金。庭前赤子。籲地呼天。求之不勝其急。庭下衙役。較多量寡。持之不勝其堅。日中不決。日昃無能標之。大門之外。於是加之以劫庫之名。指麾阜壯。索械庫中。鈹頭鐵鞭。得心應手。奮臂大呼。凶器將揮。跪訴者疾趨爭出矣。乃譙樓僅容旋馬。自相蹂踐。死者五十人。慘淡黃昏。僵屍狼藉。一一皆應魁殺之也。事關兩院。督過交加。應魁迫於罪無可卸。遂爲嫁禍掩飾之計。以吳應

鴻爲一繫者親家。梁斗輝亦一繫者親家。鍾聲朝爲一繫者族弟。而勞養魁之父。則曾口語犯己者也。於是捏申劫衙於各衙門。暗揭吳應鴻、勞養魁、梁斗輝、鍾聲朝等。主使於稅監。復有以與應魁葭葦。而陰爲之地者。稅監正欲立威肆虐。得此視爲參處有名。題奏誤俞。致煩官校。以生平脩謹之縉紳。漫無干涉之事體。一旦俛就詔繫。天日無光。舉國驚駭。應鴻、養魁等。初繫粵城獄中之夕。烈風盛雨。獄旁四五合抱之榕。被風盡拔。當時以爲異冤感召之徵也。縲絏入京。刑拷幽禁。使非稅監之特參。則應鴻等必不入詔獄之門。非應魁之暗揭。則稅監必無誣主使之疏。是稅監爲應魁所誤。應鴻等爲應魁所陷明矣。詔獄五年。以半刺之吳應鴻。竟作囹圄之鬼。冥冥九原。固不可復起之人間也。乃勞養魁等。蒙皇上矜放爲民。園土餘生。復有衡門泌水之樂。可不謂慈覆再造哉。顧伸冤者。聖王平物之情也。用才者。聖王植國之幹也。勵僻遠者。聖王鼓舞之神也。信詔旨者。聖王幾康之理也。使養魁等。罪由自取。黜革何詞。乃以事外之人。遭彼阱中之陷。嚴刑久禁。今有餘枉。若復褫其衣冠。不還故物。冤抑謂何。故復准會試。而冤抑可伸矣。況養魁等碌碌無奇。猶曰。孽非自作。不可竟棄。況俱生陳文恭之鄉。素聞至道。獄中與馮應京諸臣切劘。益懋進修。今山間聚徒講業。日以淑人自樂也。有士如此。何忍棄之。故復准會試。而才杰獲庸矣。廣東距京師八千里。而遙資斧爲艱。計偕之士。不能半至。即其籍在賢書。猶時以寥落爲恨。況丁酉一榜。登薦不多加。而無辜褫三佳士。其於遠藩士心若何。其於聖明鼓舞作用若何。故欲勵士風。宜從僻遠始。而養魁等。可不亟復其會試乎。皇上三十三年恩詔曰。文職官員誣誤爲民者。冠帶閑住。三十四年恩詔曰。文職官誣

誤觸犯不可以一皆終棄者許酌量奏起。今養魁等正合註誤之款者也。未有可冠帶可奏起而不可准復會試者。聖明方彌天張羅。以闢多士彙征之門。豈故錮此三士而使偃蹇寒窗。詔旨不信於天下乎。上年按臣王以事探之士民公呈。參於司道府縣之詳議。會同總督張鳴岡。特疏具題。力爲請命。臺臣王命璿。謝正蒙。各亦疏請。總之以貪吏之誣構既明。則三士學行之脩潔。終不可掩也。三士之學行可惜。則聖明准復會試之恩數。不可再稽也。以是知此非臣一人之私言。而愛惜人才之念。爲諸臣之同然爾。乃臣之說。猶有進於此者焉。人才者國家之元氣也。慮其摧折。在持平而愛護之。慮其掛漏。在及時而收羅之。今意見之齟齬尙存。議論滋蔓。其吹求愈深者。不無摧折之慮。非所以示愛惜也。庶常之考不蚤。大選已逼。其顧避不待者。不無掛漏之歎。非所以廣收羅也。苛責未離成心。退托易於失士。乃人才之生有數。可任其摧折。又可任其掛漏哉。以有慨於中。敢并及之。臣愚可勝惓惓待命之至。

萬歷四十一年六月十五日

題爲國體宜尊國法慮廢懇乞卽允憲臣之行。傳熱審之旨。委署法司之官。以全臣節。以飭法紀事。臣念大臣行止。國體攸關。罪囚繫繫於法司。有矜之審之之法焉。今炎熱之令已踰矣。而熱審之旨尙稽。止緣皇上以眷顧大臣之心。於出城之副院許宏綱。尙倦留未允其去。并署法司之官。亦尙未之另委也。然已知其堂印久封。未有熱審堂官。此傳旨所以少需也。夫大臣進退之際。罪囚出入之間。所繫何如其重。業閱兩月。乃可尙稽宸命乎。以臣愚揆之。今日欲尊國體。須曲全宏綱勇決之義。而速允其去。何也。今之大

臣何過可寬於指摘。但被摘有可以無去者。總之摘人者。宜量時自審於言。被摘者。宜量己自審於去留也。乃宏綱蒙邪臣之名。誠非其心之所甘。冒出城之禁。或迫於幾之難待。旨留再三。徐俟未敢徑去。不過身欲退而大義欲明爾。誠及時予之允去之綸。宏綱得奉命而歸。庶令中臺有不苟去之副院。因令他日無聞譏憤。輕言去位之大臣。蓋大臣之過。人人共見之。而大臣之去不去。惟皇上裁決之。斯國體藉之不傷矣。今日欲振國法。須垂軫法司。宜恤宜訊之多囚。慨然沛發熱審。另委刑部署篆大臣。以任其事。何也。本年入夏以來。既苦熱蒸。隨又連月綿雨。各囚幽禁獄底。以日爲年。蚤恤一朝。各囚蚤脫。一朝苦楚。遲恤一日。各囚多此一日悲號。先定罪者。非堂官莫裁宥否。新參送者。非堂官無可呈決。缺一堂官。便誤一部之事。誤刑部事。并耽閣臣科。及都察院。大理寺。通政司。各衙門之事。故矜恤格而未行。是稽曠蕩之恩也。訟獄停而久待。是滋淹滯之失也。堂印久封而無署。是法司可無堂官也。刑罰棄置而不問。是國家可無法紀也。皆因不放宏綱。以至此。曷若熱審之旨。與放宏綱之旨。卽日並傳。便可另推大臣。署掌刑部。庶堂無塵封之席。部有職法之官。仰承德意。而照例審矜。將多囚發審。而刻期呈決。所有裨於國法。不已大乎。況今日論人。有以片言常事督過。其意或止於相匡。乃大臣動輒註籍乞身。反多誤政務而不顧。上下睽隔。釜鬻益甚。枚卜之舉。愈切請而愈杳。然大僚之推。百補牘而不一應。不知朝廷之倚芘大臣若何。其可漠然不加之意也。今日法紀之弛甚矣。京棍王日乾等。悍然冒說謊詐騙之條。蜀弁莊安世。公然肆燒劫奸淫之惡。宦裔高務實。高務觀等。其久構爭產堪羞。其近奏殺母可駭。人心不肅。怪事疊聞。乃以刑部

法紀重地。皇上復不備其官。不修其政。不委署事之人。憲法之陵夷。夫安知所底止矣。臣見近日大臣。求去者多。獨宏綱一人。義在必去。再留適益之苦。慨允其去。正以全大臣之始終。而熟審未發。刑部久缺。署部。則又關臣職掌。故敢披瀝以請。伏乞聖斷。允行。臣愚幸甚。

萬歷四十一年六月二十七日

題爲粵地可憂。防澳防黎孔亟。懇乞聖明。急講潛消酌撫之術。處餉取將之宜。以鋤亂本。以固東南疆圉。事近接邸報。見兩廣總督張鳴岡。廣東巡按周應期。有粵海倭防。費端多歧之疏。又有峒黎殺傷官兵之疏。皆臣夙所隱憂。何能無言。臣惟他藩奸宄。獨爲患於邊隅。爾乃廣東濠鏡澳夷。竊據香山境內。梗化黎岐。肆暴崖州地中。則腹心之疾也。他藩奸宄。常旋至而旋遁。爾乃戶牖網繆。夷人踞澳爲己有。峒谷生聚。黎岐扼險以制崖。則盤固之寇也。使我無所貪以絕之。有可恃以消之。不開釁以挑之。復不偏用威惠以響服之。而効順之效。萬一可幾。則今日防之道可知已。夫濠鏡距香山邑治不百里。香山距會城百五十里耳。有陸路總經塘基灣。徑達澳中。其三面俱環以海。在廣州以澳爲肘腋。近地在夷人佛狼機。以番舶易達。故百計求澳而居之。查夷人市易。原在浪白外洋。後當事許其移入濠鏡。失一原止搭茅暫住。後容其築廬而處。失二。既已室廬完固。復容其增繕週垣。加以銃臺。隱然敵國。失三。每年括餉金二萬於夷。貨往歲丈抽之際。有執其抗丈之端。求多召侮。閔然與夷人相爭。失四。乃閔廣亡命之徒。因之爲利。遂乘以肆奸。有見夷人之糧米牲菜等物。盡仰於廣州。則不特官澳運濟。而私澳之販米於夷者更多焉。有見

廣州之刀環硝磺銃彈等物。盡中於夷用。則不特私買往販。而投入爲夷人製造者更多焉。有拐掠城市之男婦人口。賣夷以取貨。每歲不知其數。而藏身於澳夷之市。畫策於夷人之幕者更多焉。夷人忘我與市之恩。多方於抗衡自固之術。我設官澳。以濟彼饑餓。彼設小艇於澳門海口。護我私濟之船以入澳。其不容官兵盤詰若此。我設提調司以稍示臨馭。彼縱夷醜於提調衙門。明爲玩弄之態。以自恣。其不服職官約束若此。番夷無難居中國之理。彼且蓄聚倭奴若而人。黑番若而人。亡命若而人。以逼處此土。夷人負固懷奸之罪。不可掩也。抽餉有每年難虧之額。彼乃能役我兵船數隻。兵數百名。護貨如許以入澳。夷人善匿虧餉之罪。不可掩也。不顧漢官法度。彼所當遵。動曰紅毛夷鬼。我所首防。夫室廬之固。夷種之繁。非有大故。不遽加兵。殊方異產。航海而來。仍與流通。未遽阻絕。此王者柔遠道自宜然爾。但夷人多蓄倭番。彼自滋中國之疑。中國自宜解之使徙。故宜體悉其情。隨申以內夏外夷之義。先免抽餉一二年。以抵其營繕垣室等費。諭令卽先遣回倭奴黑番。盡散所納亡命。亦不得潛匿老萬山中。仍立一限。令夷人盡攜妻子離澳。其互市之處。許照泊浪白外洋。得貿易如初。澳夷一清。并議驅除老萬山之藏伏者。夫不卽絕接濟。以扼夷人之糧食。不卽動大衆。以阻夷人之向化。第我無所貪。先免餉以服其心。我有可恃。令避地以潛消其類。未有正德年間。可逐出境外。而今遂不可使徙者。乃量彼量己。選將足兵。操其必服之道。臣尤先望之當事。若夫聽其在澳。只須嚴爲之防。則當事已有成畫。臣無容再嘵嘵矣。至於黎岐。從來生育於山箐。與佛狼機之來自外國者殊也。從來自衣食於山谷。與佛狼機之資我貿易者殊也。強黎止能

誘致崖人之貪呆者。與佛狼機之收聚倭番亡命者殊也。強黎止肆虐於弱黎。及商民之近其巢穴者。與佛狼機之作梗海上。關繫省會者殊也。先年各黎不戢。士民羣而訴之。撫按便宜提兵而討之。非不會力有所創矣。乃生岐羅活。向來蠢蠢負隅。橫行劫殺。抱由亦先曾黨惡者。然抱由德霞。原係熟黎。是有司所民視之者也。舊冬與生熟黎。乞兵於官。求借銃礮助勢。爲協剿羅活之計。當事慨然許之。乘助勢之機。以設我之防衛。未爲失策。獨將兵者。敢於深入騷擾。又分兵而代之攻。節制之謂何。先攜熟黎之心。次失招撫之術。兩進兩衄。固其宜也。始所欲。止一羅活。今抱由德霞。并逆顏行矣。數其近年之劫掠。已殺百餘人。已焚百餘房。已搶百餘牛。其惡非不可勦。然前此民固忍之。官未嘗聲其罪而問之也。數其近年之敵殺。所殲官舍六名。所傷兵黎百名。其惡非不可勦。然由官兵往激之。非由強黎出犯我而生事也。化外之族。聖朝何不能容。殺人之人。王法所必不宥。武弁無詞於節制之失。覺自我開。黎人有詞於飾過之先。威不廢惠。則姑寬黎人。以不勦。責其將刺刃官舍兵黎之人。與引誘逃民。盡行縛獻正法。其餘仍以招撫行之。雖似法未甚伸。毋亦今日事勢之宜然乎。夫東粵山海無處不防。而澳黎二患尤急。歲徵兵餉。兵船兵器等銀四十萬兩。猶稱不足。皇上復以十八萬監稅因之。近聞粵東大水。淹至肇慶城門。則高要高明三水南海順德新會等縣。患水可知。使稅不減。民愈窮。兵餉愈不足。粵愈不可爲矣。故寬稅爲足兵。徒夷安地方之首務。皇上試較東粵一省。與十八萬金孰重。何不早允監稅之捐減耶。且夷人在昔。行賄濟奸。以得入澳。得結廬。得不掘去塘基灣路。今督按諸臣。洞悉往弊。計粵久遠。安能容其踵轍中。賦撓我成算。

者。故今日欲徙祖宗所絕貢之夷。聚市外洋。必斷以行之。庶可濟也。乃輕殺買禍之弁。粵常有之。如昔年欽州設計掩敗。誅戮無辜。言之令人憤惋。今日羅活之役。止由奉行不得其人。遂至狼狽若此。欲爲粵東振武備。宜先擇將。凡得操兵柄之人。必不敢溺賄嗜殺而後可耳。防澳防黎。雖事有重輕。勢分難易。總在當事任用得人。處置得宜。其權尤在皇上。先允撫按寬稅。而聽其便宜行事。或粵土可保無虞乎。伏乞勅下兵部查議。如果臣言不謬。覆議上。請行與督臣相機設策。廟堂不從中制。要以拔除禍本。奠安海邦爲務。非特一時之利。實萬世之利也。臣可勝惶恐待命之至。

萬歷四十一年七月二十二日

題爲貪肆部郎。賊跡有據。謹從實糾參。乞賜顯斥。以甦商困。以肅官常事。自權璫四出。關市之間。重徵疊稅。十餘年來。無商不苦。無地不成。蕭條景象。此實今日苛政一端。諸臣請撤之疏。屢達宸衷。無奈天聽尙高。止仍歸之有司。如額徵解。此猶曰閹宦宵人。惟利是視。羶慕不釋。因而眩惑聖心。以致橫徵未豁。是惠商仁民。固不可望之貂璫之輩也。若夫祖制設立關河抽分。各以部郎差管。會典所載。規例昭然。則姑爲不得已之徵。供不可已之用。尤孜孜務求寬恤。令各省遠商。獲沾錙銖餘潤。夫非部臣所宜爾哉。奈何身列曹郎之班。甘效貂璫漁獵之行。有如提督通惠河道工部郎中趙士吉者。其人大可異焉。臣得聞其賊跡頗悉。敢爲皇上陳之。士吉以經紀曹仁。快手周子科。師三爲耳目。以胡書辦。蔣委官爲腹心。到任之初。派運磚經紀三十餘名。斂送緞匹銀器等物。幾至百金。名爲叩頭常禮。親出遍查麻地。及蘆葦錢糧。輒誣

兩河平民，包佔罰贖，以數十計，收送者皆胡書辦也。自大夥木板，以至鄉民一木一杆，必稅不漏，隨查其額外餘銀，收入私囊。奉委巡邏者師三也。蔡義經前官已稅之板，指爲漏稅，而責罰三十金。傅生員現有稅票之梳木，半途截回，嚇以沒官，而後罰十金。趙十已稅之松板，指爲黃花美板，而復責罰二十金。皆曹仁周子科之左稟也。署後鑿一荷池，責令淺夫挑濬，欲便宅內觀玩，復令淺夫加築重牆，慮旱溢而預爲蓄洩，役夫至一二百名，皆蔣委官爲之督役也。抽木商李惟慶等舵梁二百餘根，崔國等大木百根，程燕等黃松六百餘根，皆不問以脩倉，盡發經紀，賣銀沒入自潤矣。借木行經紀錢三等木植，脩倉乃抽木，竟不給價，反因其稟而痛責之矣。胡祥買段時髦之黃松，不批該局驗詳，徑自抽稅四十金，至竟不貯州庫矣。且有謂其給車戶張經洪鷗之運價，每千扣一百兩，胡書辦復索二十兩者，有謂其脩理三倉，大委一名，索四十金，小委一名，索十五金，致指揮陳端富，千戶宋時燦，俱不堪用者，有謂其不查挑濬淺夫，脩倉軍夫，使之名名著役，止聽委官開報，曠工扣銀入己，各州縣衛，解銀可查者，有謂其脩理裏河六閘，並不查其灰料工價，止聽委官開報，二八扣給者，有謂其查通灣居民，凡蓋房一所，責令赴署，告明納銀一兩，偃然街道應行，事不容私自蓋造者，至其原任都察院經歷，及署屯田司印，尙多種種穢跡，未暇縷數，總之心沒於利，政以賄成，所當亟請顯斥，以清仕路者也。參看得工部郎中趙士吉，廉隅不飭，賄賂大彰，以抽分爲壓足之場，肆誅求於商民之衆，貪同鼯鼠，怨讟已深，法若凝脂，穢逐非過，雖然，士吉之害，止在通惠河也，猶其小也，若稅監之未撤，則害且遍天下矣。通惠河之抽分，爲脩倉脩河而差也，不可罷也。若監

稅行於權宜。則苦極而當議罷矣。況累年解進之金。旣已無算。殿門箭樓之用。不患不充。乃各省撫按。請獨不報。請減不報。天下咸謂皇上溺臭穢之金錢。頓忘生民之疾苦。工部請脩殿門不報。請脩箭樓不報。天下又謂皇上借難竣之大工。延留權稅之弊政。聖心不白。民困不甦。何如速興工役。以壯皇居。大觀也。慨撤權稅。以踐詔旨。大信也。留財力於民間。以示休養。大政也。得失原自較然。停止難容久待。故不特斥一貪肆之趙士吉。而毅然罷各省監稅。乃臣疏請之上願也。臣可勝惓惓待命之至。

萬歷四十一年八月二十八日

題爲粵邦獨苦稅金。內臣接差可駭。懇乞卽賜裁處。以甦多難極窮之民。以樹東南一隅障蔽事。本月初二日。職捧誦聖旨。李鳳旣已久病垂危。著在任調理。不准辭。所收現在稅課。并一應錢糧方物等項。差內官阮昇前去暫管。俟本官病痊。卽回京應役。該衙門知道。欽此。職不覺仰天嘆曰。兩粵事同一體。先年粵西稅監病故。皇上止命四川稅監兼管爾。今內臣何敢於蒙蔽聖聰。不西粵事例之循。而令阮昇得營接李鳳之差哉。豈以粵東尙堪腹削乎。夫粵東非有雨露之粟。地出之金。異於中州大藩也。粵東商民。非有計然之積貯。陶朱之多藏。比於中州大賈也。粵東土田狹少。清丈之後。稅畝多不足額。遂有姑從權宜之計。以八分有奇之實田。作稅一畝。甚苦如南海縣者。人丁一丁。不論有力無力之人。槩編五錢六錢七錢八錢。甚苦如韶州潮州惠州等府者。稅契銀兩。江西欲徵不能。乃粵東獨以科舉一項。取給稅契之銀。遂有編於錢糧。又徵於當年推收者。各藩派徵糧差。俱有賦役成書。獨粵東向來不見之梓刻。遂有糧米丁

差。編派未甚清確者。他藩錢糧。惟供本藩不可已之解用。乃粵東協濟粵西兵餉。其可已不已者。四五萬金也。他藩地方之患尙緩。乃粵東濠鏡澳夷。蓄聚萬餘不軌之徒。又生熟黎岐。跳梁崖州。盜賊之倣。無處無日不報。歲徵兵餉兵船銀四十萬兩。尙稱支給不敷也。以浙江福建湖廣大省。監稅止各五六萬兩。止因當時粵東撫按失計。稅金遂三四倍於大藩。至今尙十八萬金。加之商稅不足。又派之糧差。又派之稻穀。又派之宰牛魚蝦菜果等項。又派之濠鏡澳貨二萬兩。權解十餘年以來。商民皮肉已盡。脂髓並窮。愁苦無聊之狀。自撫按司道。以至府縣之官。無不人人目覩心悲。望皇上撤回李鳳。脫粵東商民於湯火者。見於撫按之屢疏可徵也。豈以李鳳向來不言。遂聽粵東省小稅多。而置之不問耶。豈喜粵東每歲解至若而金。遂寶此朽蠹之物。而不顧粵東之土地人民耶。皇上先年於京畿各省稅金。屢有蠲畱。近年徽州米稅。今年江西閏月銀。亦蒙蠲免。獨於粵東未有免也。豈粵民有負於皇上。不能作東南一隅捍蔽。不能歲供百萬租庸耶。李鳳初至粵東。縱棍徒以掠鄉民。所在蠢蠢思亂矣。賴巡按李時華。縛其爪牙而寘之法。李鳳始稍戢。人心始稍安。自後李鳳時復咆哮。粵民屢欲撲殺之。亦賴時華禁止。李鳳乃得保其首領。阮昇不知前車之當戒。急作李鳳之後身。乘士民之所未及知。政府部院之所未及陳請。營求內援。立取中旨。一時傳宣。舉朝無不駭愕。以爲天下臣民。延佇停止而不可得。今粵東望照粵西帶管事例。而不可得。且旨內又無不許騷擾地方之語。將聽阮昇惟所欲爲耶。今兩京缺大僚不補。起復科道不補。各省巡撫。久推不下。而阮昇隨請隨允。何忽略輔理之人。獨急遣爲暴之人耶。稅歸有司徵解矣。以附近稅監兼

管之安有不如額輦致天府者。允差阮昇令其爲食人之虎。營窟之兔。吞墨之魚。大非便計也。今繪旨已布矣。其慨然反汗。止阮昇不得行。以明大聖人作爲。威斷不測。此舉朝臣子之仰望。粵東百萬赤子之生機上也。其赫然再下禁束之旨。使阮昇只聽有司解至轉解。不得差役坐擾地方。違者逮譴。次也。其阮昇善自爲計。效承天太監杜茂。江西太監潘相。寬稅自明之意。力請皇上。稍減粵東稅額而後行。又其次也。夫陛下舉動。法今傳後係焉。顧明不能周萬里之外。於粵之極苦尙未知。心不能絕貨賄之牽。於粵之稅緡尙未割。威不能制閹宦之夤緣。於粵之稅監尙接遣。君德之損也。聖治之累也。國運之憂也。微臣冒昧力爭。非止爲梓里計。正爲君德、聖治、國運計爾。且科道諸臣已有先職而言矣。閣部、院諸大臣必有繼職而言矣。粵東撫按將來聞知。又必有繼職而言矣。皇上可惟閣尹之言是聽。而於科、道、閣、部、院、撫、按之言。若水投石。曾不稍爲轉移耶。乃目下轉移。其最急在減稅焉。蓋牛判銀八千兩。稻稅銀四千兩。是徽州米稅。江西閏月銀之類。諒皇上必首爲粵東減此也。若目前慮澳夷之叵測。澳夷亦雄據以相持。不過爲此二萬餉金爾。權此不能益內帑之毫毛。減此可以圖夷人之徙舍。夷人已成尾大不掉之勢。皇上乃悛二萬稅金之獨。以忘國恤。皇上之自爲謀。與爲皇上謀者。其能忽然視爲無害。而不急急獨此耶。以職愚識。亟減牛判稻稅。以明一視之仁。亟蠲澳貨二萬金。以圖徙夷之策。其餘稅金方物尙十四萬有奇。暫照舊有司徵收。於皇上嗜好。未遽捐捨。於嶺海生民地方。可暫講求安戢。似屬最利之術。如職言不謬。伏乞勅下戶部。覆議題處。或止阮昇之行。固屬望外恩施。其亟減前三項稅金。尤非獨粵東一隅之幸。實中外疆

國之幸也。職可勝激切待命之至。

萬歷四十一年十月初四日

題乞中外推用。盡沛俞綸。以收臣工佐理之功。以成聖明日新之治事。臣念人主用人。宜陞者陞。宜補者補。宜起者起。在臣子視之。自一命以上。無一非朝廷錄用之隆恩。在人主視之。當旋推旋允。無一非帝王拔擢之常典。卽其間優之以不次之遷。改起之於罪廢之幽抑。固不可謂非不測恩寵。然人主不自以爲恩也。恐一以爲恩。將不免有恠心。有難色。而大僚庶位有缺乏之員矣。自我皇上近年以來。視爵祿若王家私物。視中外臣子。盡可爵祿羈縻。視尋常陞補。一概以爲難濫之恩。於是陞大僚難。補科道又難。起廢棄則尤難。本年八月聖壽。屆期允枚卜一事。放滿朝薦等三臣。大慰普天臣民之望矣。而於輔臣所請。大僚巡撫廢棄候補中。僅允用河道山西督撫二臣。何其甚恠也。猶幸答輔臣之旨。有曰。所請諸事。朕悉發行。慰輔臣不必疑慮。赫赫王綸。必無不踐之理。今旣兩月矣。續所俞用。止吏部兵部二侍郎也。昨日俞用。止福建陝西二巡撫也。明知事當舉行。稽緩非所以示信。臣敢以卽日舉行爲請。可乎。在昔六部都察院。正貳之員並充也。尙虞幾務叢脞。今除兵部之外。各部止一員。都察院則全缺矣。前月借人以署刑部。今借人署都察院。又借人署吏部矣。一員有一員之職業。一員缺。則一員之職業亦缺。以一人兼兩署之事。虞時與力之難周。以此署之官。攝彼署之事。虞官與事之不相習。則今日推陞吏部尙書。左都御史固急而已。推之各部尙書侍郎。都察院之院副院僉。何可不速點用也。巡撫秉鉞一方。軍民屬其統馭焉。河南

湖廣等舊撫各已得旨回籍。有願旦夕獲釋擔負。有尙靦顏戀留地方。以不畱不去之身。無異於觸藩之苦。以安民馭軍之計。難望之候代之人。則已推各省撫臣。何可不速點用也。海內廢佚名賢。濟濟林麓。八月間。吏部彙推呂坤、鄒元標十人矣。其餘多賢。遽難更僕。試舉臣所真知者。如王學曾、區大倫、林熙春、程紹、安希范、朱長春、鄒德泳、何喬遠、孟養浩、彭應參、遼中立、龐時雍、宋濤、白所知、馮從吾等。皆品足以維世。才足以經世者也。其潛養久。其世務之閱練甚精。其享名大。其求副此名之作用必不小。乘時而用之。不虛豪傑之生。因人望之屬而用之。可省奏請之煩瀆。銓臣以此爲用人之要。相臣以此明集思廣益之公。俱在速用呂坤以下諸臣爾。至於候補科臣劉文炳、熊明遇、新授楊道寅、候補臺臣唐世濟、朱塔、魯之賢等。棲遲旅食。久者年餘。近者亦已數月。諒先朝必無此事。孰若以必用之人。使之卽各位其官。以有用之才。使之卽各脩其職。此非特惜諸臣之久候。正所以作敢言之意氣也。凡此數事。皇上當行未行。其誤總在視用人爲殊恩。視官員不必備耳。夫視用人爲殊恩。是臣子止資名位爲寵榮。非以國事爲肩荷也。則待臣子之禮甚褻。視官員不必備。是國事不必期。官僚之相成。止以重臣子之勞瘁也。則優臣工之意。渺聞。每每在內缺極而後補。在外候久而不得代。忠直久鋼於衡門。補授淹延於旅邸。以致乏賢景象。乃於聖朝見焉。況大臣之任國。固以實心望之。乃有誤求易見之事。不能引過以謝人言。有力任難廢之典。未能待時以息衆口。早知其相牽以去。而大臣遂空。小臣之論事。固以虛心望之。乃惟伏機而以過端誣人。更流挑激之禍。惟逞臆而以詞鋒求勝。莫揀株連之殃。恐究之相傾不止。而同類亦空。從來人材消長。若

循環然。第未有汨轍相尋。如今日者。皇上於當用之人。復以猶豫之心處之。欲賢碩之充庭也。何日之有。臣以爲部院正貳之員。寧備無缺。內外工之允用。寧速毋遲。林下名賢之召起。寧寬毋刻。蓋員數備則遇缺不足虞。允用速則需次不爲苦。召起寬則終抑非所憂矣。用人爲今日第一義。臣有感於朝署之蕭索。恭誦皇上朕悉舉行之旨。輒敢披瀝陳請。仰祈旦夕舉行。以成皇上之新政。以彰皇上之大信。其裨益豈尠小哉。臣無任惓惓待命之至。

萬歷四十一年十月十五日

題爲春序將臨之國吉日宜定。懇乞聖明。卽賜俞發事。方今朝廷政務。惟福王之國爲第一切要。情屬父子兄弟之間。計關天下國家之大。奉旨明春三月舉行。已經渙布於海內矣。而三月出邸吉日。欽天監又已擇。奏疏在御前。必然有當聖心。宜其隨上而隨允也。乃候之數旬。未奉明旨。而取盈三萬之贍田。尙諭戶部上緊查給。此何時也。胡爲復較量田畝哉。廷臣實不無惓惓於此。何也。臘月距三月時至近也。都門距河南湖廣等省。地至遠也。搜索三省之地土。事至難也。縱地土或可少益。須先如期之國。而地土俟之徐議。此時之不能急愜聖心者也。顧地土決難多得。第費再行搜擾。而贏數恐成畫餅。此勢之不能終順聖心者也。三月舉行之明綸。天下共信至確。獨地土一節。急愜聖心不能。終順聖心不能。廷臣安得不惓惓。旣惓惓矣。自宜公疏以請。單疏以請。職典禮者。急在典禮。於是禮臣亟請定日。而力言地土之不可強括。其有匡掇無將順也。正以觸發善愛福王之美意。職地土者。重在土地。於是戶部遵復行催。而終言三

萬之難搜括。其將順而復匡救也。正以挽回輕議增田之念端。蓋欲完大典。必以吉日爲的。安得不請定吉。欲速定吉。必慮以增地作難。安得不爭贍田。夫今日三省再查。非有丈尺所未承之地。非有冊籍所未載之地也。非有租庸所未派之地也。總在皇圖賦產中取之爾。但地租供於皇上。爲足國給邊之公。地租益於福王。爲食租衣稅之私。贍田不議增。而還爲民間各有之業。是斂億萬人之租稅。以爲福王之歡。贍田尙議增。而強取民間各有之業。是斂億萬人之怨嗟。以爲福王之樂。不知皇上於此。當何從耶。皇上誠早定吉日。其善非可一二盡也。早定吉一日。則京畿藩省之耳目。早傳一日。善一。早定吉一日。則皇上玉成福王之心。與福王善承隆愛之心。早明一日。善二。早定吉一日。則九廟在天之靈。九有屬望之情。早慰一日。善三。早定吉一日。則三月舉行之大信。早成一。廷臣請發之疏。早省一日。善四。至不求增供贍之田。亦有四善焉。不使愛子之贍租。過隆於介弟之數。善一。不使求田欲富之念。反勝於建藩屏國之圖。善二。不使授圭分茅之始。遽行損民益上之事。善三。不使左右宵小之徒。得行其甘言巧誘之計。善四。定吉日之善如此。不增田之善如彼。只在皇上早持睿斷。因天時之佳淑。吉日可一檢立頒。定土田之限制。贍地可一言立決。誰能阻撓。誰能熒惑。而皇上爲此遲回也。昔聖王之爲人父。在止於慈。慈而合於道之謂止。今皇上之厚福王。已無可加。再有增加。反悖於聖王之慈爾。且國家將有吉祥善事。必違忤之氣。盡融和德之風。丕洽大易有之曰。天之所助者順也。人之所助者信也。試使檢發諸臣公疏單疏。慨然允行於已定之月。而并定其日。於萬餘已多之田。而不更求其多。皇上斷斷於桐封之典。福王欣欣於茅土之榮。

廷臣瀝血而披陳。皇上轉圜而採納。以此暢和德。以此明順動。以此彰大信。臣主一心。天人交助。何其盛哉。伏乞皇上俯採臣言。先將欽天監選定三月吉日。卽行允發。其輔導長史官員。允從吏部異日優升之疏。其上者。比照先朝德安長史李贊。以禮部出。後升光祿少卿。次亦照劉以平參藩之升。仍令俸期止於三年。毋久淹也。并乞下旨。定取船隻之數。及定頭運二運三運之期。其餘各有司存。均應早行料理。若先定吉日。啓行之後。三省撫按。回奏贍田事體。聽聖明裁賜。定奪啓藩封之萬年。定大計於一日。社稷幸甚。臣民幸甚。臣無任悚息瞻企之至。

萬歷四十一年十二月初二日

題爲險僻部郎狂躁無忌。挑時情爭構之隙。啓聖明不信小臣大臣之心。乞賜重處。以明官守。以肅朝常事。臣於戶部郎中李樸。曾一識其面。曾聞人論其生平曰。此識見偏僻。議論乖方。背理沽名。樹邪生事之人也。至今日而人言驗矣。李樸近有奸邪科道。結黨要錢。驅逐正人。紊亂朝政。乞密行查訪之疏。大指於同己之人。則呈身以保之。於異己之人。則捏事以誣之。於東林講學之徒。則不羞以奸險之身。而欲附入其黨。於附東林者。所欲排之人。則不難効鷹犬之力。而輕讎其人。之生平。加其人以莫須有之事。冤其人以未安妥之擬。於品望相若之大臣。而輕置軒輊。於公論所共憤之舊輔。國法所不貸之奸弁。而支離牽扯。以混人省觀。內欺本心上欺皇上。敢犯朝士之公論。敢肆毒於科道。直言秉公之名流。既以要錢說事。輕之。復云卻參他人要錢說事。是又欲諸臣參人要錢說事之疏。并見疑於皇上也。既以結黨捏造流言。

誣之。復云。卻參他人結黨。捏造流言。是又欲諸臣參人結黨。捏造流言之疏。并見疑於皇上也。彼至醜如宿娼。雖卑官下吏。所必無。而亦信口以誣科道。此而可誣。何不可誣耶。事非心之所欲言。雖父不能得之。子。姚宗文等。發憤於時事。各言其所欲言。或爭學臣之不當勅。則勸學臣之錯。固自顯然。而誤勸學臣之外。於孫瑋之宿望。不少貶也。或言年例之不必爭。以推陞之職掌。一疏便明。而總憲去國之故。執爲太宰之驅逐。終誣坐也。人雖四省。心無殊見。言無殊旨。卽此大同。便見至公。李樸不曰至公。而曰百人爲黨。以數論也。如以數論。則李樸今出死力。以附和人。以結驩人。非復所言孑然一人。樸已墮落朋黨中矣。況李樸附和結驩之心。非姚宗文等爭人材爭國事之心也。又況臺臣劉廷元。止以參蹠僞之于玉立。觸恨李樸。蓋于玉立附東林者也。田一甲。止以條陳倉政之弊。蠶觸怒李樸。蓋倉政之弊。開於李樸者。種種也。朝廷之補闕拾遺。惟科道諸臣是賴。今於大同至公之論。指爲結黨。假令皇上稍有惑志。將視彬彬日喉舌之臣。盡爲朋比。結納之徒。沮聖明用人聽諫之心。銷正士補牘納忠之氣。貽害豈尠小耶。今日臣工凜凜功令。惟是閣部院寺諸大臣。惕於議論。科道小臣。還以議論自惕。倘科道中有可指摘。近來不乏自相糾劾之人。何俟皇上行訪。如皇上必欲別白人才。查祖宗朝及皇上初年。有大臣召對之典。一舉行之。凡政事人才。皆與閣部院寺諸大臣。而自參確。何品流邪正之不斷也。今李樸不曰召對。而曰委訪。廢聖明咨詢卿輔之常。導人主視聽旁寄之漸。左右得承以行私。賢否必至於倒置。委訪之言。其可行耶。其不可行耶。年來議論多歧。有挾時之志者。恨不能挽之清靜。不意近日煩言稍息。李樸突肆狂吠。滅公排正。爭

構復興。誰實挑釁。君子懼科道之見摧。乃李樸故行誣捏。使皇上不信小臣。君子望閣部院寺大臣之召對。乃李樸欲請委訪。使皇上不信大臣。廢棄股肱。屏絕耳目。孤立之勢成於上。舛錯之政見於下矣。李樸以此爲皇上謀。正不忠之尤。奸邪之甚。九廟之靈所必殛。兩觀之誅所必逮者。乃謬以奸邪以當斬。加敢言之科道耶。李樸欲諛科臣翁憲祥以託重。今憲祥直斥其險惡而不受矣。李樸欲先發以制田一甲之參劾。今一甲直論列其貪穢而無餘矣。先言孫居相之無黨。後再言吳亮嗣說事要錢。把持稽滯。拾唾橫誣。何怪科臣姚宗文等。指出喉使之。人是李樸雖欲誣亮嗣而不得。祇令居相先不免於人言爾。驅逐正人。紊亂朝政。此自小人常態。李樸以此誣諸臣。不自知其說僻而險。心邪而不利於善類。實逐正人亂朝政之首也。日來諸臣參駁樸本已無完膚。臣可無言。但近來盜名亂政。實繁有徒。李樸之險惡。比沈正宗。賀煇之潑而過焉。所關世道不小。臣不嫌已賤。特繼諸臣之後糾參。伏望皇上俯察臣言。將李樸卽行重處。庶奸邪有所懾而不敢肆矣。臣可勝惓惓待命之至。

萬曆四十一年十二月十七日

題爲籌餉宜發內帑。籌遼宜援北關。懇乞聖明。與臣子各勉其難。以多積濟年例。以真心任邊防。大破苟且彌縫之習。及時責實。毋誤疆場事。臣觀皇上邇來專意私積。一二十年内庫之多藏。不知將待何用。廷臣無有敢輕請發者。具以聖意難於捐發爾。臣又觀邊塞邇來餉乏多故。各軍之虛冒耗弱。未聞查覈充實。生財節用。考成足兵之大政。臣子鮮有殫慮講求者。具以時勢難於任事。任怨爾。皇上之所難。溺貨賄

而忽邊疆。臣子之所難。狃故常而疎備禦。臣敢以各勉之說進。日者永平饑軍。倡聚挾糧。皇上一聞御史之奏。允借帑金五萬。卽行解給。逮九卿奉旨會議。借南北部寺庫金。多至一百一十餘萬。皇上亦已慨然許之矣。以九邊嗷嗷待哺之士。一旦補給月糧。其誰不歡呼鼓舞。願効死力於塞上者。顧皇上的所允者。借金也。部臣所與借金。並請者。發內帑也。科臣張國儒等所專請者。亦發內帑也。皇上吝發內帑之心。部科諸臣。非不久悉。然義所當發。故諸疏懇請。不敢後於借金。乃皇上允借而不允發。何耶。以各金相提而論。部寺乃額徵有限之金。內帑則權進無限之金也。部寺乃有正項支用之金。內帑則未有正項支用之金也。部寺乃借必須還之金。內帑借不須還之金也。其監稅不撤。斂愈久。怨愈深。藏既多。亡必厚。如唐德宗。瓊林大盈之散。決裂不收者。且不必言。卽今日一百一十餘萬之借給。運司鹽課之催解。僅可補給四十年。爾今年下年。又須取足別金也。況借給之在南京。催解之在各運司。未必盡刻期解至者。苟欲給足舊年。亦未見暫借司庫存積之爲得也。於此再議權宜。不可復借於部寺。不可復催於運司。又不可責屯鹽考成。搜括節省之效於某月。則非慨發內帑。計無復之矣。臣誠慮今日借幸得旨。將遂用朝三暮四之術。挨排歲月。又將遂忘久病蓄艾之慮。不圖所以處足。今年下年邊餉。不圖所以處補。目前借過各金。必爾邊事重壞。南北部寺。各窘而不可支。孰若幡然下詔曰。四十二年。各允發內帑二百萬。助充邊餉。令邊士有所激而增壯。邊臣有所藉而足兵脩備。諸臣得効力於屯鹽督賦。搜括節汰諸務。俟之數年。可望太倉充饒。盡今日允發內帑之效也。不然。累年帑金所積。俱屬悖入之貨。今日勢窮不發。正爲屯膏之

凶拒舉朝之公請。是以帑金增失德。棄邊防之長算。是以疆圉易朽。藏計皇上必能辨此。臣所以亟請發帑也。至今日邊庭之震恐。無如遼左爲甚。非惟食乏。而且兵寡。非惟兵寡。且遼民之中。餌以去。被縛以去。積歲不知若干矣。近日。哈赤執壻婦小故。思逞於北關。北關中國之順藩也。開原重鎮之屏蔽也。雖驚悍。有中國之威靈在。其驚焉無投鼠之忌。我不出兵以援之。是自棄其順藩矣。是自撤其屏蔽矣。且有言曰。若兵馬出來。球北關。免不得動手相殺。是夷醜諄謾之言。雖聞之不足爲怒也。其如輕中國。逞夷氛。漸不可長。何額設之舊軍。先年召募之新兵。及今覈練。無不可資以戰守。如曰尙寡。而不足用也。則今日部寺借金。必有解至矣。量給以飽士腹。量支以調用他鎮之餘卒。及舊將之家丁。疾召飛馳。戰守惟命。不必卽加兵。惟偵。將有事於北關。則量遣我師以援之。在我士飽卒多之聲。必有以懾之。之膽。又在我有援無棄之信。必有以安金白二之心。北關宜與。和。吾何爲不論之。和。北關不能與。和。吾決意能爲之援。不援北關。北關必至失守。而。德我之心。未必有也。援北關。北關庶或可保。而。犯我之心。未必加於往昔也。在昔仰逞。俛首就殲。犬羊何嘗難制。今畏。如虎聽其吞併順藩。掉臂不顧。使後來談遼事者。追咎某撫某道。始失北關。其何說之詞。嗟彼遼民。累朝之所休養。不足供。之搶擄。奈何復不爲鎮北之民計。不思所以全其捍衛也。臣所以請球北關也。夫悟內帑之藏私。而慨然發之。察北關之繁重。而毅然球之。以皇上明聖。斷此何難。猶恐中外臣子。破苟安而力任事之難爾。耳目可以塗飾。而時勢付之難支。前後可以推諉。而勞怨避之不任。今日畫策。則侈口深譚。

明日奉行。則虛文套應。邊事何堪再壞。諸臣猶泄泄從事耶。今諸臣籌餉籌遼之策。不啻詳矣。不見之行。何取於言。不行以實。何益於行。必一屯田也。既清之於將官之養廉。又清之於勢豪之侵占。一鹽政也。既清之於私鹽浮引。又清之於餘鹽大包。西北有未興之水利。爲之寬其徵。而使勇於耕作。戶工有並開之事例。爲之覈其入。而并酌其貯支。三宮子粒。各處金花等銀。請自今貯之太倉。還接濟邊餉之舊。弓箭弦條。南布北布等料。請自今改解折色。收軍國兩贏之利。內官之興作。光祿之廚役。必查其冒濫。而清汰得行。邊兵之虛缺。邊餉之節省。必稽其錢糧。而開報無漏。急請罷稅。橫徵一止。庶正賦可冀。易完。嚴行考成。司府并督。而文法不少寬假。不循增餉之請。致以媚□空國儲。不務長厚之名。致以體卹寬民運。內府不嫌於搜括。期積聚少而成多。北關急爲之應援。務全屬夷以自固。凡此皆設誠致行。思得一當於邊計。於是廉其奉職。有裨邊餉者。定爲政最。不然者。殿之。此其專責在計臣。於是選其提兵。可任北關者。急遣駐防。仍料理兵食濟之。此其責專在遼撫。苟且彌縫之習。雖已沉痾。今日實心所激。萎茶者振起。虛弱者充強。夫非邊防復固之一時哉。臣言不離諸臣唾餘。第發內帑。採北關。皆中時之急務。責任事以實心。又濟時之大藥也。伏乞聖明睿燭。斷行國計。幸甚。邊防。幸甚。臣可勝惓惓待命之至。

萬歷四十二年二月初四日

題爲稅監可撤不可移。懇乞聖明。憐粵東。信詔旨。急止稅監營求移住。以安子遺。以彰公平之治事。臣里粵東。各省棍徒聚焉。稅監收之爲用。可惟其橫惡之所欲爲。故棍徒導稅監入粵者。實繁有徒。舊年稅監

李鳳物故。蒙皇上察廷臣言。不委阮昇。止命閩監高案兼管。以惡璫十餘年荼毒之慘。一旦脫離。當粵東聞命之日。歡聲動地。無不人人啣祝聖壽。無不謂可免復有稅璫入粵之憂也。詎意奉旨兼管。曾幾何時。高案輒聽棍徒唆撥。而有移住粵東之望。福建巡撫袁一驥。明形章奏。而惓惓爲高案請移哉。臣昨閱邸報。見一驥海外情形當審。內地禁防宜周之疏。其於福建東西二洋。稅金三萬。請罷之以戢奸販。又於福建尙稅金二萬有奇。請或罷。或付有司徵解。此皆爲閩請命。此撫閩所宜然者。乃言及稅監高案之已贅。當止爲閩請撤可矣。何一則曰。近因廣東稅監李鳳病故。已奉旨代爲督理。該監方欲移住彼處。或姑聽其便。一則曰。廣東稅銀一十六萬。以閩稅不及三分之一。彼監既已理稅奉差。自當以銀數多處爲重。噫。是何言也。大臣之誼。當以四海爲一體。以一夫不獲爲己辜。以驅惡而不波及於人爲作用。一驥亦節鎮大臣。何其示人不廣。而秦越粵人若是哉。夫今日普天之民。獨粵東極貧極困。豈皇上尙未悉其狀乎。粵東民非衆於他藩。地非廣於他藩。然粵東一時之稅。他藩三四年之稅也。江西七萬。而四萬取之贛。福建六萬。而三萬取之東西二洋。乃粵東取二萬於澳夷。猶不足額。每年湊解十六萬。無一非民膏民脂也。近蒙聖恩捐減二萬。粵民喜躍欲狂。然二萬之減。在他藩當爲曠蕩之恩施。在粵東僅爲太甚之稍去。糧差之加派如故。而杼軸日空。一日牛米雞豚菜果之苛斂如故。而關市日擾。一日盜賊日繁。一日軍興之費。日增一日。昔年欽州濫殺。目前澳夷隱禍。姑未具論。近日征黎之師。因各弁違令。致敗士卒之多。命可憐。而議勦之糧餉無措。無兵食。誰能爲皇上翦逆黎。無土田市井之遺利。誰有別術以足餉也。粵民困苦。

至此高竊卽令營得入粵。然已無可腴之民膏。祇有不可輕犯之民怒。已無有可托之窟穴。祇有蠢蠢思亂之民情。入粵何益於竊也。竊若窮於身之無容。止有自請罷回一策耳。而眈眈粵土者何爲。傳聞棍徒若而人。自寫走閩。爲該監畫策。該監爲棍徒所用。欲求一壓足於粵。而忍心如一驥。復導之爲擇食之梟。高竊有移住之望。而一驥請聽其便。能掩主使之實否。粵東正苦稅銀之多。而一驥請移高監於銀多之粵。能揜下石之實否。舊歲阮昇初奉遣。廷臣交章而爭者。言稅監不宜復使入粵也。皇上悉粵東稅多之苦。如此粵東久被李鳳之害。若彼不難幡然反汗。爲粵東罷一阮昇。今一驥反欲爲粵東進一高竊。何一驥之心。獨異於廷臣之心。而一驥仇視粵民之意。獨異於皇上之意耶。明背兼管之新綸。陰堅遣璫之弊政。効力於高竊而不恥。播惡於粵人而不顧。天下之公議。乃尙爲之詞曰。臣非以鄰國爲壑。一驥可自欺而已。不能欺人也。其疏末僅輕點可撤一言。而聽彼移之廣東之語。猶津津不置。其用心亦太勞矣。惜非仁人之言。又惜非巡撫宜有之舉動耳。臣以爲高竊在閩爲贅疣。在粵東爲豺虎。贅疣害也。豺虎尤害也。在閩坐而虛糜。在粵東飛而肆虐。坐而虛糜不可也。飛而肆虐尤不可也。故徒信兼管詔旨。尙未足以安粵民。惟并撤高竊。而付各稅於有司。則爲閩也。實所以爲粵也。乃臣更有請焉。下民望上之恩。無已。明主賦下之財。必平。今粵東尙徵一十六萬。雖云勢難驟減。然公平之道。謂何。談者不謂粵民之易虐。而謂粵力之能供。權之者。不憂物力之已殫。而憂銀數之少絀。粵民之無告久矣。今當聖君臨御。賢相承休。宏一視之仁。必深憫粵民之苦。持大公之衡。必嗣議粵稅之蠲。有如大賜減免。令粵民得比他藩稅額。則聖治

民生兩大有裨。璫輩亦當不萌覬覦。又何營求移住。鄰國爲壑之可虞哉。臣可勝悚息待命之至。
萬曆四十二年二月二十九日

題爲聖心繫吝未化。大僚點用。畱難。懇乞深惟至計。慨然轉移。卽檢推疏。以充卿貳。以圖盛治事。臣讀大行皇太后遺詔。有曰。親賢圖治。永保鴻基。煌煌聖訓。女中堯舜之頌。當傳萬世無窮。皇上以此實見施行。光昭至孝。當且不俟旬日。尙何庸臣言之煩瀆哉。願用賢莫急於大僚矣。乃禮、刑、工、三部。今各止侍郎一人。戶部連總督倉場。應四員。今亦止侍郎一人。兼管吏兵二部之樞臣。今且以被言謝事矣。彈壓百僚之。都察院。今總憲與副僉俱缺矣。近日大理寺之印。亦虛懸也。以一人署四印。見於南戶部尙書衛承芳近疏。則南京之缺人亦甚矣。夫缺而未推者。當俟會推矣。其餘推各有人。時見催請。皇上願置之而不俞用。何泄泄耶。元旦日。皇上批輔臣疏。有所請大僚委屬緊要之旨。是大僚之緊要。皇上所明知也。點用之宜。速亦皇上所明知也。乃宜點未點。總由聖心之繫吝爲之。蓋謂任事之人不必多。而省官之念內錮。謂推用之人須精擇。而慎祿之念內膠。是牽繫而不豁然者也。愛爵祿甚於愛賢碩。惜事權甚於惜恩禮。是靳吝而不沛然者也。聖心得無有是乎。有之。臣請得究言。以破此惑。蓋以一官營一官之職。斯事集于精專。以本署綜本署之務。斯績凝于素習。祖宗朝長武必備其員。今數署止各一員者。謂何。率皆以一人營數人之事。心力之不精專。何如也。祖宗朝未聞開署缺人。今吏部無一人現任。都察院不點用一人者。謂何。乃強以別署而攝本署之務。事體之不相習。何如也。吏部會推。每苦人乏。皇上點用。每恐人多。是明有困

抑人才之意矣。一員署本署之事。謂可無廢事。一員兼署別署之事。亦謂可無廢事。是明狃目睫支吾之計矣。海內共以呂坤爲賢。立待其總憲。皇上有一呂坤而不急用。并閣副僉而不點。是自隘天地覆函之量矣。大臣有相資之謀斷。不可不備長貳之員。大臣有當恤之精力。不可不量職務之畀缺之極而不補。朝廷自令政事之廢墜。缺之極而後補。諸臣徒皇皇搢拄之不給。今二月選憑未發。三月教職未選。四月之選期又迫矣。吏部印信。樞臣未必出理。別曹又乏可署吏部之大臣。其候憑各官。久稽寒耗。芻米可慮。大選遲誤非宜。查先年吏部侍郎楊時喬患病。雖有郎中林學會代行之例。然惟卽點吏部侍郎。尤覺最爲妥便也。都察院印。前無所屬。致擬各省更替之御史。題催無人。擬巡倉更替之御史。題催無人。風憲事體。一切寢閣。今止借一大臣以署之。是憲署之設。何其重。陛下之用憲臣。何其輕忽也。至于戶部錢穀之司。倉場頭緒煩瑣。必欲萃而責之一人之身。未點新推倉場總督。俱屬難解。試觀目下寥寥數大臣。朝宁成空虛之形。政事成苟且之弊。謂盛世何。吏部進退百官。爲百官而用吏部三堂卿。有何濫恩。爲吏部事務急切。而卽點在任見推之吏侍。何煩再計臺憲三堂官。暫缺不可。乃閣署懸缺半年。寧不貽風紀羞。方今倉庫空虛。經理財賦之計。卽二三大臣協力猶難之。況止一侍郎也。故目下最急當點一在京吏侍。點二三臺憲堂官。及戶部堂官。其餘兩京卿貳。均不可不速點也。不然。豈皇上前月視爲緊要。今便視爲可有可無之官。可緩可急之用哉。瑩精治理如皇上。必不其然。況今日人材。廷中誠空虛。林下則充實。吏部之啓事。原未嘗遺。皇上之點用。百不一二。如鄒元標、趙南星、鍾羽正、王德完、楊東明、區大倫等。譽望共歸。

賜環久待使從關部屢請一旦點用廷臣公論寧不暢然至如候補科臣劉文炳熊明遇等臺臣唐世濟朱塔等久者候已兩年進退無據職業無從自效故意抑滯非所以作言官之氣也或拔之巖居或用之旅食總屬聖主用人之宜非臣子敢阿所好因大僚而敢贅及盡候宸衷之睿斷爾伏乞皇上游心廣大去繫吝之私於部院長貳速賜點用斯政務可舉而有道之治成矣臣可勝惓惓待命之至

萬歷四十二年三月二十九日

題爲廠差詐稱緝事粵民惴惴動搖懇乞聖明卽行嚴究以懲城社之奸以安嶺海極困生靈事職查律文有凡近侍之人在外詐稱私行體察事務扇惑愚民者斬如鑾儀司官校尉皆近侍之人則東廠總旗等官皆校尉類也私行扇惑皆斬則明挾恐嚇可知矣近閱邸報見廣東巡按周應期有廠旗矯旨驚粵等事之疏中間言內監阮昇同史總旗持東廠牌稱奉旨緝事於正月十五日到省一時商民洶洶人不自保又言指故監司房孫岳及跟隨趙應魁兩人欲得而甘心焉如是藉手風波轉生枝節指某家寄頓某家窩藏株連蔓引合城之內有百金之積者其誰不爲兩人戚屬也者今緝拏方殷起解無日臣未知粵之所究竟也職讀甫終篇輒仰天太息曰有是哉史總旗之敢於魚肉粵民身犯大戮若此哉夫總旗一么膺弁流耳或東廠差之去未必皇上有旨命之去也卽皇上有旨命之去亦命彼緝稅監之事情非命彼緝民間之事情也今舉朝不知所差史總旗聖旨若何乃奉旨緝事之牌公然懸之省會矣粵東商民不知所恨司房孫岳跟隨趙應魁情狀若何乃緝拏孫岳等之奸宄且駸駸波及於平民矣傳聞東廠

太監以各省稅監爲食邑。歲中差人兩至其地。因歲有所餽以爲常。是東廠之差人。非果察各稅監之隱。不過分各稅監之有餘也。又止於索監而爲蠶之食。向無敢腹百姓而爲虎之噬也。今史總旗恣無忌憚。視粵民爲其鼎俎爾。豈無所藉口而然哉。職緝閱舊年粵東撫按會冊奏報。故監所收錢糧方物及遺貨等項。奉旨就著撫按差委的當員役。與同差去內官阮昇押解進來應用。如有乘機偷竊的。緝拏治罪。今史總旗所藉口得計。以是緝拏一言耶。顧旨內無並差史總旗之事也。緝拏之旨。原未委之何人也。史總旗而非假借前旨。卽奉有差委別旨。原不可聞於天下。又何得籍之以脅粵民。史總旗而非假借前旨。則奉旨緝事爲詐稱。明犯欺罔皇上之罪。以逞其虐取粵民之奸矣。向來粵東疾苦甚於他省。粵民見一官司。不啻見帝。見一內璫差役。不啻見閻王也。兇暴如史總旗。挾詔旨以爲重。今日曰緝某人何事。明日曰緝某人何事。磨牙擇食。何求不得。於漫無干涉之小民。可詐稱奉旨緝事。恣其橫噬。則於差同阮昇押解之員役。將亦可橫生枝節。任其憑陵。不知粵民何辜。又不知差解之役。何人敢承也。職常扼腕廣東監稅之多。始於病者狂者之誤議。成於懦民之罄刮。以供爾皇上未悉粵東之民。已極窮苦。於歲進之額。未允倍獨。得無謂粵力尙可供耶。是猶有貪官於此。勒受訟民多金矣。尙眈眈未壓。說者不曰。向猶貪吏勒之。今宜恤之。恐後矣。乃曰。其訟民力實能餽。今尙可使之能餽也。夫烏知貪吏所至。在在不敢不餽。夫豈在在皆饒有力者耶。奈何不憐粵民已苦。誅求之極。尙加之以能供之名。使不得與江西、福建、廣西、衡量稅金耶。自古以來。未聞粵東稱財賦之地。從前歲徵監稅十八萬。自有粵東以來。未聞有此苛斂之苦。今

粵士蕭條景象。粵人言之。科道言之。閣臣亦言之矣。粵民若徼天之靈。皇上必沛特恩。大減稅額。又必憐怒。嚴治詐稱奉旨之史總旗。又必詰究東廠之差遣惡弁。驚恐地方。夫詔旨乃聖王之明命。此可詐稱。何不可詐稱。矯旨乃臣子之大罪。一行重創。何縱橫狐鼠之不斂戢耶。且近日皇上於內璫之疏。不免輕信。致沛嚴旨。如天壽山守備太監潘朝用。憑倚番役。尋害平民。致王進忠等。赴告巡按。情迫宜然。朝用庇番役。不赴對理。反以偷盜陵木。誑聳聖聽。其種種非盜之情狀。朝用自寫之疏中。其種種架殺之真心。朝用又自露於言表。萬一不肖鎮撫。殺人獻媚。所損聖德者大矣。至仁如皇上。欲寬民之力。尤欲全民之生。有正法之念。尤有慎刑之念。臣因史總旗之肆虐。而并贅及。倘蒙聖明採納。速正史總旗之誅。以安粵民。立剖潘朝用之誣。以宥王進忠等。所關民財民命非細。臣可勝翹企悚息之至。

萬歷四十二年四月初十日

郭給諫疏稿卷二

題爲大舶法不當造。督臣守不可誣。惡璫舉動謬迷。書詞橫議。無法無天。懇乞亟行撤究。以儆奸邪。以安疆圉事。臣念邇年來倭情叵測。閩廣節鉞之臣。無日不以防海爲兢兢。凡巨艦出沒其間。皆法所必禁。固戒嚴於商民。亦不肯少寬於藉權肆惡之人也。粵東吏治。近覺改觀。各屬無餽上之儀。徵收減耗羨之重。監犯冤濫。時聞釋放。且有如陞任鹽法僉事李標。丁憂東莞。知縣胡繼美。治行卓絕。士民思之不忘。夫孰非撫按正己率屬。有以致之。是臣方幸無浮海大舶之造。庶幾波之不揚乎。臣又幸總督兩廣張鳴岡之賢。斯能令民有恃無恐乎。詎意福建稅監高竊。敢造浮海通倭大舶。見於督臣張鳴岡。撫臣袁一驥之參疏矣。又敢於捏端污挾督臣。見於竊復鳴岡之書詞矣。夫高竊虎視梟鳴。其咆哮桀驁之性。無日不欲恣其所逞。近奉旨兼管粵東稅務。自恃聖眷有加。遂怙寵而無所顧忌。試問竊海舶厲禁於疆臣。而竊何以造也。又問竊海舶未有造於昔。而今何以突造也。又問竊海舶豈置之不用。而用之將何之也。商民藉之以窺利。異貨多載而潛馳。亡命藉之以渡險。奸謀交通而句連。盜賊投之以托身。海島之間。賊射而鯨吞矣。倭賊賄之以導入邊境之內。烏驚而魚亂矣。竊昏何知。惟是百千稅棍。聯絡於左右前後之間。諛之以權。而不惕之以法也。動之以利。而不言其貽害也。竊直爲若輩所愚。惟其所用。故試語以臨不測之淵。冒風濤之險。猝有不慮。徒葬千百人於江魚腹中。竊心尙或少動。若語以邊海大防。皇上再三申飭。疆臣歲

月網繆。你不應如此明梗陰壞也。竊有悍焉不顧已耳。故大舶法不應造。惟嚴諭以詰之。竊猶可及止哉。至竊以種種無影之事。誣讎鳴岡。則喪理欺天。類於說鬼說夢。蓋黎師敗衄。鳴岡必有以圖後效。沿海守禦。鳴岡必有以嚴責成。臣不必言。乃臣知鳴岡。大非侵兵餉。貪夷貨。取珠寶之人也。況故監李鳳遺賫。係司道府縣。當日會查封收。隨造冊報之兩院者。至明白。至詳盡。乃云委官盡獻之門下。欲誣鳴岡。并誣委官耶。知公祖者。莫如子民。鳴岡嚴禁餽遺。清汰耗羨。於粵東沿海吏治。最爲得力。倘竊書之誣捏得行。將督臣可任其要挾。高竊入粵之望。可令其得遂耶。竊倖得兼管粵稅。遂聽棍黨畫策。揚揚治入粵之裝。鳴岡題參而拒之。怨恨入骨。凡可以污讎挾制鳴岡者。無所不至。自知粵民不容改。故以鳴岡爲尤。據其書云。令預無賴。倡亂遏阻。夫粵民極窮極憤。竊入粵。立見粵民剝刃其腹中。豈止遏阻之云。竊未入粵。方與粵民相安於無事。何由有預令之云。不知四月間。閩民擁集喊圍。欲共磔竊。竊藉巡撫三司。而後解散者。豈亦有人。令閩民發此大難哉。總由竊暴其民。民自以暴應。橫虐不悛。鴟張狼噬。竊之所至。誰不欲甘心之者。今意在挾鳴岡。祇增粵民之憤恨。意在請旨入粵。祇自獻前日折價則省。跋涉之奸僞。皇上觀竊今日之殺閩民若此。焚民房若此。陳兵脅閩之巡撫若此。閉門挾閩之三司若此。大亂作於一宦。兇焰震於八閩。紀綱凌夷。冠裳無色。誠欲安閩之疆宇。則逮竊以下之於理。時日難緩。尙可容其徘徊觀望。而得仍兼攝粵稅之舊哉。粵民不堪再虐之情形。臣言之已贅矣。皇上慨沛德施。大減粵稅。令與江西福建稅額較量定數。悉歸有司徵收。雖所以爲粵民實。所以令竊不死於粵民之手也。況宦官縱橫。莫甚今日。潘朝

用誣奏御史准告之犯。盧受誣奏御史召懇之民夫。誣奏此朝用與受之罪也。其參朝用與受各疏置若
不聞。則皇上無以辭於諸臣也。至承奉樊用。近侍李朝雲。倚藉藩封。騷擾驛遞。金錢恣所誅求。官民受其
荼毒。鎖擊御史之差役。謾罵巡撫之大臣。罪大惡極。當與高竊並逮而重治之。夫復何疑。中官輩善事皇
上之左右。其所求乞。輒取旨如寄。其所犯罪過。每曲庇而得及於寬政。藉叢煬竈。夤緣爲奸。亦由聖心優
游不斷。自示以隙。而養成之。仰祈赫然震怒。執治竊等二三惡璫。以明聖衷之無昵。以全大小臣工之體。
以保中外生靈之財命。治道幸甚。臣愚幸甚。可勝翹企之至。

萬曆四十二年五月十五日

題爲閩璫明肆亂逆。久禁府官。惡狀異常。中外駭愕。懇乞聖明。卽勅逮究。以儆殊兇。以安疆圉事。福建稅
監高竊。以行戶告領物價小故。遽逞無君無法窮兇。白日殺人。飛箭焚房。斬轅門以脅辱巡撫。遮桌闔諸
臣入署。而經日經夜。羈留打造通番大舶。誣鱧兩廣督臣。前月臣有參疏。又廷臣連疏參論。幾於章滿公
車。止一奉高竊事知道了之旨。再奉高竊朕卽處分。可俟旨行之旨。未聞卽勅撤回。處以重典也。皇上豈
以竊之惡。不過與昔年之陳奉。梁永。高淮。近日之杜茂等耳。稍徐撤之何妨耶。以臣所聞。參而較之。其罄
地之脈。竭民之髓。斂怨毒以歸於皇上之一身。此竊與奉。永。淮。茂之所同也。其於閩民而殺命焚居。於督
撫桌闔諸臣。而鱧脅羈辱。於通倭厲禁。而明犯作奸。播兇焰以震動東南之疆圉。此奉。永。淮。茂所無。而竊
之所有也。竊之惡倍蓰於奉。永。淮。茂矣。況竊囚禁福州同知陳豸。已二旬餘。閩民憤聚。欲爲豸出力而未

敢三司奉按臣之牌。差官諭放而不可得。三司之差官。空手而入諭。案之左右。提刀彎弓以相向。撫按解嚴。俟案自縛請命於天朝。案則戒嚴。募兵盛衛。臨張於省會。撫按以打造大舶爲已恣。方恨禁法之難施。案復搬運夷貨以自如。更決隄防而不顧。試問案之久禁。陳同知意欲何爲。得毋以同知海禁素嚴。不便案弄兵於海上耶。又得毋以同知民所素戴。可藉保案之首領於目下耶。有一能其職之吏而禁之。有一得其民之吏而禁之。目中豈但無同知。寧復知有撫按。司道耶。豈但無撫按。司道。寧復知有朝廷耶。當其殺民命。焚民居。劫撫按之日。閩民非不能手刃一案。以爲京觀。特受提命於撫按。司道之諭。受約束於撫按。司道之法耳。案明知借撫按威靈。便可免憤民之斬戮。不必執同知以爲質也。其必纒繫同知。非但恨其海禁素嚴。藉其民心素得。乃者聞案之險猾。冠於權稅諸璫。其鈐制官府。威攝百姓之計。愈設愈深。故明拘陳同知。而牢籠惟意。其惡可勝道哉。蓋前月庭殺多人。焚屍署後。彼戮死之跡。竟掩。獨燒房之燼。猶存。民恨通天。案誠懼一洩難支也。於是擇賢吏如豸而禁之。前日刃劫巡撫。變爲今日幽囚屬官。欲召兵則募集自衛。欲通番則泊舟運載自如。平日請倭教刀之術。思逞於一朝。豸不能自免其身。撫按不能免其屬官。百姓雖怨怒。何所恃以洩其不平之氣。其誰不俯首弭耳。此案幽禁同知。以挾制各官。震攝全閩之險計也。此一時也。全閩之天日無光。海徼之人心搖動。不知全閩爲誰之疆圉耶。人心何緣而搖動耶。皇上試思。案於閩爲權稅耳。其作奸不法。撫按得執憲以繩之。豈其反執撫按之屬吏。皇上又試思。豸豸以海防。俾其得靖海上之奸氛爾。案敢肆不法。猶得執海禁以束之。豈其反制命於梟獍之闔璫。且豸非

獨撫按屬吏也。實朝廷命吏。豸之命辱於案。非辱豸也。實上辱朝廷。故案多禁陳豸。一日其罪亦多。一日赫赫鬼神奪案之魄。正使其犯人未犯之法。至於罪大惡極而不可解耳。豸以本道之故。挺身入案。署其心可以自安。刑餘無禮之加於禽獸何難。豸賢自能辨此矣。撫臣擁節鉞。鎮全閩。宜或宣揚國威之不少貸。使案知罪引愆。或力任民憤之可暫消。使案解釋陳豸。以至汰其濟惡之爪牙。毀其通番之大舶。皆撫臣所當爲。而姑列罪參奏者。蓋料事不可爲。有請天斷之亟。加已爾。又按臣徐鑒疏曰。將力奪之乎。恐兇焰一逞。玉石俱焚。將姑置之乎。則兇性不移。幽繫莫解。惟有籲天正法。以誅案之罪而已。撫按爲陳豸請命之切如此。蓋臣子爲國家討大逆。今案逆節已明。不誅何待。彼中官蠱惑之言易行。然安可假以朝廷之威福。中官孝順之物幾何。安可易以祖宗之法度。今爲閩慮者曰。閩倭所欲入也。案以身爲之招。則閩危。爲紀綱慮者曰。豸民所聽治也。案不釋諸纍。則紀綱掃。爲國體慮者曰。案民所積怨深怒也。案自櫻於鋒鏑。則國體傷。惟是重撫按彈壓之權。全同知防海之體。收威福大柄。還之於皇上。不過持尺一之詔。令陳豸還署供職。卽日械案赴京。明正典刑。其兇奴田聰。徐文。朱朝臣等。殺人大刀手方長等。聽撫按拿獲重究。大舶之在南臺者。聽撫按毀拆歸官。於以明國家之大法。甚嚴。臣子之作逆難追。閩海幸甚。國家幸甚。

萬歷四十二年六月初五日

題爲夫價折扣。杠木損傷。內官貪昧不敬。懇乞嚴行究處事。本月初九日。孝定皇太后。靈輿發引。值淋雨。

泥濘勢固難行。然使人夫贏餘。杠木堅固。則梓宮前進。自無艱難太甚。至出尋常意料之外者也。乃是夜初更已盡。方至土城。關臣等祭畢入城。已二更三點矣。及閱邸報。始見永康侯徐應坤疏稱。臣等隨護梓宮。稽查扛擡官軍。止一百名有奇。查據委官李真等稟稱。送到內監官軍九千員名。其擡梓宮人役。該監以營軍不慣扛擡。俱折價另行僱覓夫役等情。又於閣臣疏中。見尙書王象乾報稱。梓宮昨夜未至清河。以杠木將傷。難以前進等語。夫折價乾沒。知充私囊。不知忠於王事。此中官之常。然此弊往行於各項興作耳。今皇太后葬事。此何等關繫。而可仍襲舊弊耶。乃內官閹福輩。收到官軍九千員名矣。公然以另僱扛擡梓宮爲名。計人而折收其價矣。撥軍至於九千。可謂至多。梓宮扛擡之役。視冥器亭車之役。實爲獨重。以至多之軍。供梓宮獨重之役。所充擡夫人。僅盈百。於原請撥派之數。迥不相符。使百人盡皆強壯耶。然未有沿途齊用其力者。此百人苦於人數之寡。因苦於人力之弱也。使百人而非強壯耶。則未有僱倩仍取其弱者。是另僱不過有其虛名。未嘗有其實事也。既擡梓宮人寡。其餘豈盡供發引之役。此福輩之乾沒。於數可知。既另僱爲虛名。其金豈復還憊弱之卒。此福輩之乾沒。於價可知。蓋扛擡梓宮之夫。該監實於軍中。取以充用。第明知發引一役。無須九千多軍。故折其贏者。以自潤。而駕言於另僱。慣役以爲名。爾至稱杠木損傷。則又可異矣。臣聞靈輿木料。取於工部。各於不可勝用中。選而取之。則內官監差廳官往耳。倘木稍不中用。廳官肯取乎。取回不堪用。該監肯用乎。當日取去鷹平木二百六十根。每根價值二兩有奇。取去虎尾杉二根。每根圍四尺有奇。長五丈有奇。價值將四十金。倘用虎尾杉以作龍虎大杠。尙

須斲而小之也。及聞損傷之報。外議紛紛。有謂該監止以鷹平小木。強作大杠者。有謂該監匿畱虎尾杉木頭截。止用其尾截不堅者。續經營繕葺郎中修整虎尾杉二根。鷹平木十根。馳往濟用。梓宮遂安步疾行矣。夫靈輿用木幾何。此番木料。共取去工部虎尾四根。鷹平木二百七十根。其紫羅罩之料。取去大片楠枋不與焉。觀續送二虎尾之堪大杠。續送十鷹平之堪小杠。則其前取用無度。杠總不堪。果有心匿抵耶。抑無心誤取用耶。聞各監共領冥器等項。錢糧二萬一千金。中間需用木料。尙藉靈輿索取於工部。故爾不壓不休。及查明例律。御幸舟船。誤不堅固。稱大不敬。今杠稱損傷。靈魄保無稍驚。比擬不敬。閻福輩何以解免也。夫竭皇上數月之哀誠。萃通國臣民之悲怛。以奉皇太后梓宮就隧。乃閻福輩。惟知措折夫價而已。糜費木料而已。其於仰體聖心。謹奉國法。謂何。錢糧領辦。福輩所專任。其折受乾沒之奸。通國皆知。非有人可分其咎者。設非一二十大臣。從中擔任料理。幾至稽誤。福輩之不容寬縱。可知已。伏乞皇上從嚴究處。庶宵小之貪昧行私。有所儆戒。於以振國家久弛之法令。塞國家久洩之漏卮。所關非小也。臣不勝仰望之至。

萬歷四十二年六月十七日

題爲時政急在用人。懇乞慨然俞用。以挽事體之極乖。以舒人情之極鬱。事連月以來。諸臣請用六部都察院各大僚。及請用吏科都給事中。交章累牘。其中言官員之缺。言政務之誤。言望補之急切。可謂各已詳明。乃皇上槩未之允補也。豈以不補爲無妨耶。抑以徐補爲無妨耶。試以事體人情揆之。則補用各官。

有不容以旦夕緩者。前月皇太后山陵之役。空署而趨事。僅僅五大臣。曰。此見任六部都察院之事者也。果成爲六部都察院否。各署有長有貳。非以備員。實以收多賢之用耳。昔皋陶稷契。無相兼之能。胡今大臣。乃有兼署之苦也。知力有所不逮。相資謀斷者爲誰。勞瘁有所難堪。體恤老成者何在。皇上曾有旨曰。所請大僚委屬緊要。又有旨曰。這各官候卽點用。知其緊要而故緩之。云卽點用而茫然置之。豈詔旨可以謾天下耶。皇上得毋謂是數臣者。足以支吾部院乎。夫僅以支吾望臣子。與臣子僅爲皇上支吾。是兩任其苟且也。部院事愈難。大臣愈乏。請補卿貳愈切。不補之意愈堅。至吏科都給事中。不過七品小臣。何足以致皇上之悵惜也。稽誤二月以來。各官之文憑。耽閣數月。奉旨下部之章疏。何以不聞皇上動念也。各已拜官。猶似未拜官。而羈留已命之地方。未使趨視地方之事。疏已下科。雖與留中者不同。疏未發沙。實與不下科者相類。往年題速給憑。以便各官之出都。今日勒一都給事中。以稽文憑之盡給。科臣見一得旨之疏。方喜天聽之不高。皇上勒一都給事中之點。任其絲綸之久閣。此臣所謂事體之極乖者也。人誰不願卿貳之充滿。而多官員缺已久。人誰不願老成之晉用。而各推留中已久。不用者。或銅之原籍。或淹之原官。而轉圜之望久虛。已用者。或苦之攝全署。或苦之兼攝本署別署。而過重之擔久承。眉鬢於一部一堂官。而憲院無一堂官。其眉鬢也尤甚。情蹙於一大臣署數缺。而各大臣屢請。不能得一大臣。其情蹙也尤甚。吏垣之印久封。千餘官之憑限誰定。人惜吏垣之有印無署。尤惜千餘官之羈棲也。吏科都給事中之點愈遲。百餘疏之抄發無日。人惜吏科之事窮旨杳。尤惜數百疏之停閣也。候憑各官。未獲展其

飲爲而先已沮其意氣。或有稱貸之憂。而煩費爲累。或有疾病之苦。而憂困增危。稽一抄卽稽一事。部司措手足以無從。前抄壅後抄并壅。臣子悵綸音之中滯。此臣所謂人情之極鬱者也。夫部院事務。皇上分授之事務耳。候憑各官。皇上作養之臣子耳。奉旨章疏。皇上裁發之絲綸耳。有政事而缺人分任。有臣子而困絆都門。有絲綸而奉行不速。似乎或悒爵祿。乃皇上自備其股肱。卿貳大臣。且當多用。況卑之一都給事中乎。似乎或執成心。乃皇上游念於廣大。卽召用逸老。且當無芥蒂。況見任一侍從小臣乎。各署篆大臣。各以卿貳力請。爲國政圖協濟也。非有卸諉之私也。皇上無一允其請。豈欲其獨力苦撐。而不返師濟之舊耶。今吏科不定憑限。不發各抄。惟以都給事中力請。爲祖宗守成法也。非無將順之念也。皇上久未沛俞綸。豈欲其言盡計窮。而姑行權宜之事耶。知事體之極乖。而急反之。知人情之極鬱。而急通之。惟是卽點推補部院之大臣。及推陞吏科之都給事中而已。臣思近月部院大臣。皇上纔用。工部右侍郎一人。而廢棄喬允、林材等。候補科臣熊明遇等。臺臣唐世濟等。各疏屢請不發。夫廢棄年久。一旦錄用。感恩甚深。其報効必大。候補經二三年。雖不因而困頓。能使卽時拜命。列之班行。所以作言官之氣不小。今皇太后大事已襄。正皇上勵精圖治之日。乃時政急切。無踰用人一事。臣曾疏言。又諸臣所已贅言。乃聖聽未見轉移。其故非臣愚能解。此世道之憂。非臣子緘默之日也。臣不憚聒瀆。掇拾懇請。萬一聖明憬悟。自大僚吏科都給事中。以至廢棄候補諸臣。一一補用。則祖宗聖母之靈。實式臨之。

萬歷四十二年七月初三日

題爲運監違旨騷擾詐財殺人甚確。法當逮問。仍乞勅查欺君減船之實。并從重處事。臣竊揣福王開國洛陽。其愛惜河南地方。當有甚於他省也。各中官仰體福王愛惜之意。當知斂戢。不復肆虐於河南地方也。況承奉樊用。近侍李朝雲。已被順天撫按交章題參。朝雲已被福王撲責。總以其需索恣睢。爾璫輩尙可置若罔聞。而仍然蔑法擢金。縱下殺人哉。執意猶有押運典寶劉孝者。橫行無忌。經河南撫臣梁祖齡。按臣張至發。參列惡狀。其罪真不容誅矣。查奉過聖旨。不曰以後押運內外官。俱要用心約束。不得縱容騷擾乎。不曰其頭二運經過地方。著委賢能司道官督率發遣速行。毋致妨誤乎。夫不縱騷擾。而地方乃賴之。然必速行無誤。斯騷擾可免耳。乃劉孝之稽遲何如耶。自虞城以至洛陽。僅僅千里之程。隨處逗遛。四旬乃到。私載之鹽。惟停舟可賣。挾索之計。惟停舟可行。該道催督雖嚴。運舟停滯如故。中間如考城之畱住三日。祥符之畱住五日。他邑可知也。畱住各久。其索求何所不得耶。當撫按逆知孝之狼貪。允司道查議。給與一百五十金。犒賞可謂已厚矣。乃慾壑無厭。虞城復索一百八十金。考城索二百九十金。儀封、關陽、陳畱、俱索四百餘金。祥符索八九十金。陽武索二百六十餘金。鄭州、滎澤、汜水、無處不索。無索不多也。每縣本等夫馬、廩糧下程諸費。已朘民間如許膏脂以供之。已竭有司如許經營以應之。乃名色復加。攘擢無已。絳纜犒賞等項之給。不幾於抑損有司。以殺豺怒耶。不幾於重困窮民。以飽鷹吻耶。夫既厚有所求。威力自隨。以逞劉孝無可犯之怒。船夫亦無不可聘之兇。夜半逼行。致夫郭之宣、唐二喜、淪死者。劉孝也。鎖打汜水禮房吏。逼之幾刎。毆祥符快子。而傷其一目。鎖夫王進元等於船。仍剝其衣鞋者。劉孝也。

縱役掠寇嘉祥錫壺仍責之五十者。劉孝也。打落李茂春。王希孟等十餘人於河者。劉孝也。鄉夫張虎。張克讓。婁蘭。婁芝。以船戶打落淪死。鄉夫張朝典。以船戶當時打死。鄉夫王從讓。以船戶打折其腰。鄉夫張朝金。范立等。以船戶毆各重傷。鄉夫張良。聶東山等。以船戶毆之落河。誰實押運。而惡饑若是狂烈哉。劉孝自行之兇。不俟言矣。船戶之殺人傷人。疇非劉孝之假手授刃也。謂劉孝可解免於殺人之罪。天下其誰信之。劉孝輩最縱橫。最善蒙蔽。其料福王之聽易惑。又料皇上之法常寬。彼既明有所恃。州縣各官。多從含容了事。何樂爲此。以與之爲難耶。故被挾索而不盡報者有之。未有虛報被索之金者也。被虐害地方。而不盡報者有之。未有虛報被虐之事者也。索財如此。殺人如此。運舟所經。恣其騷擾。雞犬爲之不寧。鄉夫莫必其命。赫赫明旨。棄如弁髦。罪惡如劉孝。宥不逮問。其何以爲法耶。年來災沴頻仍。民力在在疲困。劉孝輩或逼各夫。而仍索其錢。或稱夫少求加。而竟歸於折錢。或無船而勒折錢。或有船而分外折錢。非惟害下。抑且欺君。夫運船隻數。載在兵部刻冊。船數有定。而用夫之數因之。今按臣疏中。稱該道報二運船隻。不啻比刻冊少三分之一。而夫數則毫不減焉。船少欺皇上也。夫不減亦欺皇上也。中官之罪。益不可問矣。且福王贍田。乃撫按遵奉嚴旨。行有司查取者。坵畝分明。王田民田。不相混也。苟更換之說一倡。民田不盡爲王田不止。今聞洛陽附近。已紛紛換田。士民無不驚恐。此皆奸橫中官。巧於熒惑。乘機以行其私爾。開國之初。計較田土小故。至虧福王之盛德。搖遠近之民心。是何等舉動耶。劉孝不從嚴處。他奸其何以儆。恐異日導王妄動者不少也。皇上倘惜福王之左右。獨不計福王立國之道耶。臣可勝悚惶待

命之至。

萬曆四十二年七月初八日

題爲易名重典。諮詢宜周。謹採鄉評。闡潛德。以備博訪事。臣按禮部議謚公冊。在議中者二百人。臣鄉先達若而人與焉。考其生平。大都才望足勤世務。行誼足儀鄉邦。風猷籍甚。月旦共歸。經臺省撫按諸臣所舉。海內自有公評。臣無庸贅。乃臣鄉僻在嶺外。前修多遺於議冊。未能愬然。請舉其尤。以備博訪可乎。臣查得原任南京禮部侍郎陳榷。孝友篤學。言動必師古人。筮仕桂林教授。遷國子助教。永樂初。廷臣薦榷有治才。召試高等。擢知許州。以寬厚寧民。以嚴正表俗。郡多淫祠。悉毀之。改滁州。均徭役。時征斂。禁奸戢暴。民用大和。值文皇帝幸北都。所過先遣廷臣察吏治。榷以最聞。滁人恐失榷。詣闕乞留。擢揚州知府。攝滁州事。賜綺衣寶鈔。宴餞給驛。還滁。召充會試同考官。擢四川按察使。憲度嚴明。黠胥斂跡。軍中暴橫。有號虎彪太歲者。人莫敢犯。榷廉捕實重典。建言修武備。慎刑罰。明禮制。復義倉。正風俗等九事。上納之。宣德丙午。吏部言榷德望凝重。宜師表國學。改南京通政使。攝國子監事。師道尊嚴。善於訓迪。丁內艱。正統初。起南京禮部侍郎。五年。見王振漸專擅。乞休去。榷德行淳懿。文詞典重。卓然以風教自任。守滁十餘年。民風幾於皞皞。外臺政績尤卓絕。所陳九事。蜀至今賴之。至其讓田於鄰。垂訓於族。筋力旣倦。遇祝釐令。節。舞蹈必恭。蓋飭躬勵行。百載下猶令人景慕。可謂實有其文。師世成俗。彬彬德讓君子矣。今滁人祀榷。與歐陽修。王禹偁。爲三賢祠云。原任南京戶部尚書張泰。令沙縣。當兵燹之餘。悉心咻噢。表章羅豫章。陳

了齋之學。鷄其遺書以傳。飭鄉校。新縣治。建先賢祠。徵爲御史。巡通倉。搜剔包攬之弊。指切宮闈與政。無所忌諱。廷杖幾死。督京畿學政。憂歸。哀毀柴立。除服十餘年。坐處一廬。未嘗履城郭。起按雲南。奏開解額五名。特以神童薦董玘。後竟及第。先是象馬思牒。擅囚木邦宣慰司罕竈法。前臺使莫能斷。泰徵漢土兵。臨其境。諭以公移。思牒悚懼悔罪。亟出罕竈法。械首禍三十餘人。創之積患以平。入報命。會楊戴兩中貴。橫甚。挾一二戚里。飢法。泰列諸不法狀。請誅之。直聲益震。擢南京太僕少卿。改大理寺。薊州皇莊。與牧馬草場爭地。久不白。奉命會武臣清理。權貴初不勝譁。泰執不少徇。取永樂中開設圖書爲券。事遂剖。遷副都御史。督儲南京。條上專委任等十二事。至今奉行。遷工部侍郎。出納必公。請托無所售。改南京都察院。右都御史。屬當入賀。有言劉瑾宜厚餽。毋立異。以撻虐鋒。泰第致土葛二。瑾銜之。尋遷南京戶部尙書。予致仕。則內旨也。泰謙和。而本之以剛毅。敏練而出之。以清忠。榮辱去留。不見喜愠之色。位至六卿。猶然先人之產。沒未幾。而子孫不免於饑寒云。原任南京禮部尙書陳紹儒。登嘉靖戊戌進士。假歸省母。母病。衣不解帶者數旬。母假寐。髣髴見朱衣來護。病遂差。還補戶部主事。歷員外郎中。太倉銀庫。議設陪庫主事。以防闌出。自紹儒始。進會計錄。上優詔答之。歲省京邊冗費二十餘萬。督儲遼東。條上防守事宜。皆纒纒碩畫。一日。猝至。紹儒率衆拒守。知有備。引去。每挽強射。輒命中。遷鄖陽副使。樊襄苦巨浸。築老龍諸隄。捍之。民免魚鼈。又賑饑。全活無算。轉四川按察使。有倡白蓮教。聚黨至三千餘人。紹儒執其渠。真諸法。餘不問。境內安堵。晉廣西右布政。入爲順天府尹。搜剔奸蠹。不遺餘力。懲豪貴之魚肉縣驛者。轉太常卿。

穆廟耕籍。召詢禮儀。引據故典。條對甚悉。晉南京戶部右侍郎。尋轉左。提督倉場。疏九邊兵馬主客錢糧。疏復漕運六限。諸封事皆切中機宜。晉南京工部尙書。致仕。紹儒博大冲夷。沈毅有卓識。忠孝大節。始終不渝。所至計畫興釐。可垂不朽。學本濂洛爲宗。晚節懸車。田僅百畝。事嫡伯大京兆錫。執禮甚恭。爲德於里人甚厚。日以圖書自娛。引弟子於正學。不啻若瑞世之麟鳳也。原任光祿寺丞王學會。令醴陵。調紫崇陽。多善政。選南京御史。抗言內豎外戚嘗廕之非。內臣大臣互考之謬。揀建言得罪鄒元標。范儁。黃道瞻。孟一脈等。爭內操。爭內臣。換勅給馬等項。乞斬馮保。乞慎傳旨。侃侃陳大計。迨諫停取麒麟。言過切直。觸冒天威。致奉嚴旨。降調判興國州。尋擢司理南刑曹。晉光祿丞。學會感皇上知遇。益自發舒。陳法祖。切要。敬天。享祀等八事。切中時務。會三王並封議起。學會義形於色。曰。此事關係安危。食祿公家。何可默。遂偕少卿涂杰。上懇乞聖明。虛心議禮之疏。賴皇上寬宥。奉旨止黜爲民。瀕行貽書責閣臣曰。皇上易回。相公難挽。自是閣臣累揭。得寢並封。夫非皇上默監學會之忠而行其言乎。前二月。同署朱維京。給事王如堅。俱以諫並封。譎戍。學會不爲色沮。是誠獨立敢言者。學會旣歸。杜門卻掃。與同志訂爲約言。嘗誦薛文清之言云。工夫切在夙夜。飲食男女衣服。動靜語默。應事接物之間。於此事事皆合天則。則道不外是矣。其學不尙浮譚。務蘄持身接物。一一盡軌於道。與人藹然可親。而義所不可。人卒不敢干以私。起譎籍。再罹擯斥。坦適自如。蓋憂盛危明。天性忠義者也。近屢推通參。而學會已不可起矣。以上四臣。位有崇卑。沒有久近。要其德業聞望。皆輝映先哲。模範後來。顧世遠者。以門祚中衰。而採輯或遺。近逝者。雖物論攸歸。而

揄揚未及。臣遠稽省志。近咨鄉評。嚮往之思。旣殷。殷於家食之時。闡揚之舉。可嚶嚶於博訪之日。此臣所以不憚煩瀆。述其梗概。以備咨訪者也。然臣猶有說焉。國朝相業。莫盛於三楊。繼莫盛於文達。夫人而知之矣。要以遭時遇主。適當其易。身名俱泰。良非偶然。乃若時際其艱。而忠能悟主。若梁文康儲者。何其相品。相才。相度之不可及也。儲事康陵。當上下否隔。左右蠱惑之際。厥維艱矣。而儲不附逆瑾。致調南京吏部尙書。寧王謀入世子。司香太廟。儲力寢之。南京請回鑾。泣跪行宮外。得旨乃起。其最著者。如草奏府牧地之詔。而片語回天。如不草威武大將軍之勅。而九死不移。楊廷和。蔣冕。移病。無奈何者。儲獨收其成功。至於遜頌。膚而讓廷和。居己上。容言者。而使張榘。李鐸等。皆得顯擢。肅皇帝手詔褒諭。張九齡忠藎。崔與之風槩。卿可謂兼之矣。予致仕。此其相品。相才。相度。種種過人。迎駕甫歸。見幾明決。寵利不居。超然免於議禮新進之所側目。蓋其披肝露膽。挽回獨神。其抽身遠引。雅志早遂。始終出處之間。有未易窺其際者。乃僅僅以文康易名。於儲平生事業。殊不相肖。此近年科臣。所以有更美諡之議也。臣廣採輿論。敢併及之。伏乞勅下該部。陳榘等發訪予諡。梁儲酌議改諡。其裨於世道人心。匪淺鮮矣。

萬歷四十二年七月十七日

題爲聖心過有所恃。拒言益堅。明困大臣小臣。懇乞慨然用人。以成虛受之風。以彰圖治之實事。臣讀易履九五小象曰。夬履貞厲。位正當也。蓋恃正當而夬履。以夬履而階厲。人君不可過有所恃。若此。皇上乘大寶。挾不世出之資。御四十餘年之區宇。每經事故。動勳天下。所驚爲難。所駭爲卒。不及辦者。畢竟收拾

支吾得去。遂至玩焉。而有恃心。夫君心惟無所恃。雖全盛極治之天下。猶慮有墜弛之釁。或潛而滋焉。故其心常虛。忠言易以感動。或部院言之而聽。則部院得以展布。而收用院部之效。或科道言之而聽。則科道得以敷陳。而收用科道之效。若一有所恃。則褻然充耳。忠言之進。如水沃石矣。前月皇上慰留舊輔之旨。有曰。推心委任。中外共知。夫皇上所當推心委任。不獨閣臣爲然也。雖部院亦宜然。閣臣職掌平章。部院分任庶政。必推心任之。納其言。悉見諸實事。諸臣股肱心膂之忠。始得以自效。其間事有未符公論。未協人心。科道得執白簡。以隨其後。故科道與閣部院諸臣。道實相成。皇上於閣部科道之言。並當有茹納無吐棄也。今天聽日高。庶務寢闕。卽如儲講關係國本。瑞王婚禮愆期。諸臣屢請不能得。皇貴妃神位入殿。郭妃喪當營葬。諸臣亦請不能得。凡此事屬宮闈。關情最切。此可停閣。孰不可停閣也。乃用人所毋容再需者。則吏科都給事中。與都察院三堂。其最急矣。今斬一李瑾之序陞也。遂至困二千餘員候選之官。此二千餘員者。小之不免衣食之窘乏。大之不免志氣之挫折。近之貽一時缺官之苦。遠之釀異日廢事生亂之憂。此誰非皇上之人材。而摧之。誰非皇上之幾務。而忽之乎。故爲吏科印務而陞瑾。則省垣之體統存。爲二千餘官而陞瑾。則輦轂之驩聲震。皇上試思不用李瑾何心。久稽候憑各官何心。若之何不幡然也。都察院盡缺堂官。久已一年。推陞已各有人。催請章數十上。皇上之心。得毋難於點用多員乎。得毋難於揀擇而用乎。推用者當於廷臣之心。不當於皇上之心。臣不解也。廷臣咸以院堂爲不可缺。皇上獨以爲可缺。臣不解也。惟風憲之地最重。何怪代庖者之不能自恕。爲朝廷持風憲之官最要。何若推用者

之速點庶以重彈壓以振風紀乎。至戶部尙書與倉場總督均當急點者。皇上槩置罔聞。難踰轉石總之。易視天下無足爲吾難。不覺以恃而成執。自是所見無可破其鍵。不覺以執而礙虛。持不信臣子之心。成上下相持之迹。閣部有言而強半寢格。明與閣部相持。科道有言而槩從。堅拒明與科道相持。釜鬻之形見於堂陛。鬱抑之氣結於都門。在祖宗朝所未嘗有。何宜見於今日。願皇上亟圖之也。皇上用人之格。能稍從其寬。則銓部提衡之法。不妨從其嚴。前月陝西布政陳長祚擬加京銜致仕。奉旨下部矣。夫京銜酬榆林之勞。雖不爲過。第長祚富冠閩省。惡極滔天。與其子陳敬素橫於鄉。暴穢之款不可勝書。今已致仕。亦何必臚陳。惟裁抑於予京銜。以爲居鄉貪橫之戒。所補世風良亦非小。且近來藩臬府官。非因二親之迫切。非因註誤之難留。多以私情小故。動輒拂衣。輕於飛羽。撫按槩上患病之章。地方常失方面之用。異日一有緩急大事。相率掛冠。而莫可責成。其誤國可勝道乎。陛一藩臬知府。得旨不勝其難。藩臬知府之去。顧可惟其私臆。胡撫按不分別參劾。槩以病聞。吏部不分別罷斥。而槩允休致耶。故寬以錄用人材。此皇上事也。奉法以俟約束。因以法約束人。此中外臣子之事。尤銓部主持之事也。臣恐有慨於中。敢并啓陳。以當皇上用人之芻採。臣可勝悚惶候命之至。

萬歷四十二年九月十四日

題爲爵刑自有例律。徼倖之漸宜防。懇乞聖明。慎綸音以杜奸欺。以重功罪之典事。臣念爵刑二者。聖王御世之大柄也。爵必期於功當。苟功非足多。而爵賞濫加。則爵不足以示勸。反令奸僞覬其濫而妄營焉。

辟以加於有罪。苟罪狀已明。而辟案久稽。則法不足以示儆。反令奸邪乘其稽而希脫焉。彼奸邪輩。慮積於日月之熟嘗。計行於外之有所藉憑。內之有所牽援。雖功爲例所不爵。罪爲律所不原者。猶得以藉奏取旨。如獲諸寄。則不能不爲朝廷威福惜矣。臣閱邸報。見錦衣衛題獲假印犯人李欽等。奉聖旨。略思恭提督緝捕有功。准照例陞一級。仍署掌衛事。原辦官校也。各陞一級。夫云照例。當必別有明例可援矣。又見原任永寧遊擊周敦吉。有微臣盡職封疆。奸弁黨夷誣害等事之疏。奉旨該部院知道。夫得旨下部。當必敦吉罪有可疑矣。而孰知其大不然耶。夫錦衣緝捕之功。次不載於大明會典。臣取兵部邦政條例查之。惟擒獲真正奸細者。不分官旗軍民。量議陞級。捕獲奸言奸人強盜者。提督官各有陞級。若思恭訪獲假印犯人。非奸細之比也。又非奸言奸人強盜比也。條例明載一款云。廠衛訪獲私造偽印。硃符路引。鎮撫司問明。止照例給賞。不許陳乞陞級。以紊常例。此該部題准奉行正例之可照者也。舍此。或邇年憑左右。資緣之私。冒爵級陞除之典。是濫恩也。是弊竇也。可以爲例乎。思恭可不照止給賞之例。而可冒非例之例。以侍陞乎。況原辦官校希侍陞者。又若而人乎。都中久傳思恭爲原任掌衛王之楨腹心。凡之楨昔年賣官鬻爵。礦稅餽送。皆思恭過付之楨。一切陰險恣惡。皆思恭朋謀。臣向未之敢信。第之楨斥歸。思恭果爾進用。甫畢山陵供事。卽奉提督勅書。人言咸謂機關已構於積歲。作用始露其一班。遂至緝獲假印。原非其功。而照例陞級之旨。捷若影響。皆由思恭妙手神通。能用皇上之左右。其於例外之爵賞。猶掇之也。金吾體崇。資緣智熟。爵位立躋極貴。條例可以增開。關繫非輕。積漸可慮。其他思恭不法狀。臣未臚列。

姑就其濫殺一事言之爾。若四川都司張神武奉委追印。利黔中夷婦所有。聽周敦吉邪謀。擅兵激變。戕永摩普數千百生命。燬數百民家於灰燼。經川貴委官勘擬。坐以索夷生變。比激變律斬。兵科疏參抄參不一而足。雖碎磔二弁。猶有餘辜。卽大有力者。亦難爲之解免。今敦吉尙瀆奏展辯。盡由欲爲解免者。有以致之。譬有劇盜於此。捕誅方急。而無奈爲逋逃主者何。則劇盜固可恨。而爲逋逃主者。尤可恨也。不憐黔中如麻之白骨。不憐黔中數百已燼之民房。乃牽扯支吾。使二弁得延視息於人世。甚哉無人心無國法矣。安能不令人髮指也。功微賞厚。倘功出捕獲假印之上。何以待之。罪明誅稽。則戕殺類二弁之酷。皆可以不死矣。爵刑不審。均非所以御武弁也。至於文吏才可致用。卽宜因用以究其施。過不更紘。亦難藏垢以長其過。如近日考選另疏中書張光房。知縣趙昌運等。皆政事才也。不必列科道之選。各速補之。清曹署與人相宜。人隨署而足以自見。如刑部郎中施重光。亦文墨才也。第多有刺謬之事。該部堂常駁其審招穢迹。亦可摘陳。出守實非若人之所能任。故速允張光房等推補部曹。令施重光自反自裁。亦用與舍之所當辨也。伏祈聖明採擇施行。

萬歷四十二年十月初五日

題爲時政最急有三。聖斷難容稍緩。懇乞慨然允行。以快輿情。以便漸舉諸務事。臣謂聖王之治天下也。必當巽入以觀行政之幾。咸虛以廣受人之度。無厭事心。先距於中。亦無厭言心。堅距於外。故圖事常切。□□之所宜。聞言卽行政之所急。此庶務羣情。所以兩得也。數月以來。廷臣盱衡國事。覩縷時政。所累章

以請者。如儲講。如瑞王婚禮。如點用都察院。與各部諸大臣。如允用候補科道諸臣。如皇貴妃神主陞殿。如福王贍業之自管。一一爲時之所急。必非聖心之所獨緩也。乃皇上於儲講托詞以報。於贍業偏聽福王先入之言。其餘寂無一報矣。夫廷臣共急於諸事。聖明無煩於再計。顧宜俞不俞。人情惶惑。以臣愚揆之。於一無可緩之中。而瑞王婚禮。點用都察院堂官。允用候補科道諸臣。三者尤爲最急。敢避煩贅。而不爲皇上再陳哉。蓋論瑞王之齒。視祖宗所定宗室請婚之期。已踰九歲矣。猶之子也。有婚如期者。有婚愆期者。其愆期之故。不可不反也。猶之愛子也。無偏愛者。豈有偏不愛者。其似不愛之迹。不可不避也。府第久成。聖母山陵之役已竣。謂欽天監去冬之擇。不無太迫。豈皇上定於今年六月之旨。謂當食言。矧自六月至今。又已踰半年矣。不過一沛俞旨。可以大慰臣民之望。可以不慚父母之心。可以迓天地之和。可以遂男女之願。若聖意再稽。愆期愈久。則聖心益不安。蓋瑞王年齒昭昭。臣庶睹聞。非若他事可以倏陰倏陽。而神不測之用者。其十神之謝。喜棚之搭。可咄嗟立辦。卜此嘉平良月。諧瑞王佳耦之好期。孰有便於此也。宣宗朝。召輔臣楊士奇、楊榮。問曰。廷臣中誰可使掌憲者。毋亦以憲臣之重歟。士奇榮以通政顧佐對。卽擢爲右都御史。今廷臣推都察院三堂官。亦已有時矣。其全用以重憲地。惟命其擇用於三人之中。亦惟命何以推而久不點也。不過曰。刑部張侍郎可暫署耳。無論張侍郎無并營之精力。有近病之苦楚。試查祖宗以來。有都察院衙門。而堂官全缺否。有全缺憲臣。而至年餘否。祖宗重之。而陛下輕之。於國體朝綱。旣已大悖。況署院之自視。與人之視署院。畢竟與眞院堂異也。署院之自責成。與人之責成署院。畢

竟難與眞院堂同也。不思祖宗置掌憲之初意。不恤署院苦事體之難兼。而坐視法署久空。庶事不肅。夫皇上慎簡憲臣。固然不輕畀。然遷延不輕點。是紀綱若可置而不理。孰與紀綱天下耶。輓粟之漕差。長蘆之鹽差。遼東之邊差。此皆國事至重至急。其差又皆中差。今臺臣中別無可中差者。惟候補各道牟志夔、朱塔等堪任之。在署院卽應從權擬差題請。在皇上卽宜俞發。蓋漕差遲。將誤數百萬之軍儲。長蘆無按差。誰督數省之鹽政。遼差久滿候代。理無再巡。不差新臣。其何以肅邊政也。科臣額應五十員。今在任止十餘人爾。侍從耳目官員。豈應寥寥至此。以聖衷容納。固無摧折言官之心。然候久不補。其於容納真心。合耶否耶。耳目欲廣。言官之意氣。不欲沮折。候補科臣張孔教等。久者且二年餘矣。奈何不速補也。皇上於關聖神廟。隆以大帝尊號。錫以冠帶龍袍。固爲其忠烈義勇。獨冠古今。特示尊崇。而行天下。建醮三日。反用心於不必用之地。宮中屢作佛事。作輒數日。至置數日章疏。少加省覽。皆不過禮神迎祥之心也。苟行瑞王婚禮。黜用院堂。允補候命科道。三善政所獲吉祥。不有什百於此者哉。若夫皇貴妃神位。俞令陞殿。爲能完天井之工尙小。爲能完朝廷之典禮甚大。事屬至易。有何需疑。無論此乃東宮所注念。而皇上勅此一旨。是何心也。以各部重務。責大臣獨力。而任綜理之繁。旣非所以優老成。因樞部乏人。使總督乘隙而避封局之難。尤非所以謹邊備。何若部堂大臣。點用多員。務令在事者。樂於分重任。而不窘其精力。毋令新陞者。急於弛舊擔。而反售其欺夸。至科道諸臣。非惟候補者。應俞用以濟目前之急。而新選者。尤當並用。以充侍從之班。其另疏中書張光房等五臣。前雖兩請。今槩補之清曹。便愜公論。所全尤大。其極

一時之選。如李若珪、孫之益等。所宜與張孔教、牟志夔等。沛發俞旨者也。凡此數事。皆廷臣所嘗言。皇上所習聞者。皇上誠觀之以虛心。剖之以斷心。自當卽行。瑞王婚禮。卽點都察院堂官。卽俞用候補科道。最急之政務。一旦舉行。人情一旦暢快。其餘併漸舉行。此廟社之靈。國家臣庶之福也。臣恐可勝翹企之至。萬歷四十二年十一月二十五日。

題爲廠衛功次多虛。廠監辭陞宜允。謹據條例。檢查明旨。仰乞嚴勅該部遵行。以清捕功。以慎名器事。臣惟六部領國家之機務。都察院飭國家之紀綱。科道條政事之得失。司道各職一方之藩鎮。陛下宜何如俞用。若廠衛瑣細緝獲之功。烏可不遵例查覈。而輕賚多官。以爵級哉。近來都察院全缺堂官。六部寥寥數大臣。候命新遷各科道。棲遲都下。推陞各司道。候命多時。廢棄名賢。濟濟跽伏林藪。閣臣部臣。科道諸臣。屢章上請。久閣不報。茲歲將除。正覬聖恩。渙布命綸。各命之任事矣。乃廠衛衙門。類奉三年功次。隨上隨蒙恩典。虛受原任廕弟姪。加陞一級。李如楨加太子太保。孫應樞、梁慈等。各陞一級。賂思恭。量陞指揮使。馬應坤等。各陞一級。夫虛受。李如楨等捕功。豈一一真實不虛。可以不事查覈。而陞賞不厭其多哉。夫類奏陞賞有例。臣非謂槩不當陞也。第謂當依舊例行覈。以少裁之爾。蓋兵部邦政條例。皆載題奉明旨。以爲法程者也。內開擒獲真正奸細有陞。擒獲白晝騎馬劫財強盜有陞。官校捕盜至三百名以上。四百名以上。提督有一級之陞。果係賊衆勢兇。登時捉獲三名爲首。下手的有一級之陞。正德十六年。兵科題稱。每不過十人。給賞不限名數。已陞者仍依舊例。不得再陞。部覆強盜果係登時捉獲。賊仗見存。已經法

司問擬明白無冤者。每三年一次。照舊例類奏陞賞。奉武宗皇帝聖旨是。嘉靖二十七年。本部題令廠衛衙門。將各項獲功之人。勞績緣由。候至三年類奏。下之本部。查對相同。仍行法司覈實。應陞應賞。遵照格例議擬覆奏。其提督官酌量陞賞。取自上裁。奉世宗皇帝聖旨。這賞格依今查擬。永爲定例。違例的著該科糾奏。夫條例開載之明若此。今廠衛所獲。果有真正奸細。與白晝騎馬強劫之盜乎。果有獲盜三百名以上。四百名以上乎。果有賊衆勢兇。登時捉獲三名。賊仗見存乎。所陞果不過十人。抑員名太濫。而當裁乎。強盜俱法司問擬明白無冤。抑有未行法司覈實。分別應陞應賞乎。廢異數也。獲假印勘合。而予廢條例之所不許也。四月間。盧受矯旨廢姪。兵部不知。憑何明例。爲之題覆。真知有廠監。不知有國法者。今盧受自知廢屬踰分。疏辭姪之加陞。皇上追奪其廢。上也。尤其辭陞。次也。前月。賂思恭藉獲假印。營旨陞級。經臣駁論。乃不醒悟。求斥。而謬妄上疏辭陞。其鄙昧無知。姑無論矣。提督與官校。熟於覬賞陞。自昏於顧。冤陷。每題獲過人犯。多偷竊之雄也。不則搶奪之徒也。又不則詭騙之市僧也。先自問訊。其狀已多誣服。及送法司。真情畢露。而事犯甚輕者有之。夫傾陷無辜。以覬陞賞。此而不懲。已爲無法。矧可濫陞耶。竊計廠衛之獲功。雖存乎兵部簿卷之中。而功次之虛實。尤定於法司訊斷之後。故類奏之疏。下之兵部。仍行法司。聽其嚴行覈實。分爲應賞應陞。覆奏一照格例。恩典一由上裁。乃爲不悖往旨。乃可免於冒濫爾。蓋廠衛衙門。奉勅行事。體統崇嚴。責任專重。人人羶慕。巧營躡進。欺冒慣售。其術交通。共濟其奸。非惟冒功。且以肆虐。如平民張士。誤入該衛。而陸達繫之詔獄。干證崔樂。戴應舉。止屬牽連。而陸達錮之幽囚。達之

千戶理刑亦由假功奮進。威權在手。遂致上干天憲。下陷無辜。張士等三人應釋。陸遠一斥。尙有餘辜。若虛受功次。付之司寇。駁奏是在兵部。執例以行。而不爲動爾。庶幾金吾爵級。其稍稍清楚乎。廠衛事體。臣科誼得與聞。況廠衛陞賞之濫若此。大臣言臣。潘臬及廢棄諸臣。俞用之。留難若彼。臣竊怪之。尙皇上幡然悟其舛錯。乘今歲暮之時。渙布維新之令。點用大臣。以充部院。俞用科道。以充班行。俞用藩臬。及廢棄諸臣。使各任其職。此非特臣愚一人之私願。實舉朝臣工拭目俟之。

萬曆四十二年十二月初十日

題爲宵小窺竊。威欺橫。屢見懇乞聖明。洞矚痛懲。以隆藩王之愛。以貽士民之安。以重憲臣之體事。臣謂王者之意。向不可使宵人。得以財利中之一。爲所中。則欺誑之說。進於前。而聰明因之以眩矣。王者之威靈。不可使宵人。得以信用竊之一。爲所竊。則恣睢之形。見於外。而官民並苦其橫矣。自古蠱君心。壞國法。虐士民者。多由左右宵人。覘上指而巧爲之逢。憑主威而悍焉以逞。乃其利心中。錮示之以資。庇惡心重。假之以權。使宵人投其寶。以肆毒。籍其權。以流虐者。是上專任其過也。惟能力破其巧。投之奸。早創其怙。然之惡。殺人者不宥。誣人者不徇。撓法者不容。然後主德與主威兩全。法紀與士民並得爾。近閱邸報。有福府伴讀內官閻時。以丈田需索不遂。慘杖地戶。致周化立斃。而魯國臣垂絕。何其毒也。又有原任福建稅監高竊。以變賣公館請。而誣御史周起元爲欲竊。以解部稅銀請。而誣鄉官林世吉等。搶去九千餘兩。何其罔也。又有福府儀衛司正龔孟春。受鹽犯師管。潘濟源。賄金。倏而關縣索取。倏而滕討。王令逼奪。

致鹽院縛兩奸徒而不得。何其恣也。一月之間。相繼見告。讀之令人髮指。閩時之惡。誰縱之。得毋緣福王必欲丈田。閩時遂乘是而立威耶。高竊之誣。誰啓之。得毋緣皇上耽嗜金錢。高竊遂乘是以售欺耶。龔孟春之恣。誰成之。得毋緣福王過於信任孟春。遂乘是以撓法耶。夫贍田重事。當日查取甚嚴。有司不敢欺。司院司院不敢欺朝廷。坵畝詳明。冊籍備載。惟憑冊以問田。田必足矣。憑田以問租。租必足矣。田何必丈。請免丈者。予民以安靜。求必丈者。擾民以自肥。事事擾民。日後之禍。藩國者。勢難揀藥。乘丈虐民。今日之殺佃戶者。惡已披猖。以福藩初開。收拾人心爲急。乃有閩時故陷平民。無罪殞生。福王雖不殺周化。周化實由福王而死。利歸中使。惡叢王身。惟執閩時而坐之。債。庶幾寃命有抵。福王之令名可全。皇上之愛福王。甚大。臣所謂殺人者不宥。以降藩王之愛者此也。高竊久踞閩省。廣布爪牙。多營巢穴。其所起蓋公館。皆括地方之財而用之。又驅地方之民而役之者也。竊在閩。則公館可居。稅關之羣棍。竊去閩。則公館宜歸閩地之官司。起元在任供職。家鄉萬里。何從霸占。其誣易明。乃增建衙署。開爲現任官司之常。未聞有賣價解進者。一垣一椽。不得不畱於公署。前以起蓋苦地方。今復以承買苦地方。祗疑起元倡出公疏題參。遂以公館爲陷阱。而圖中之爾。白日被殺數十人。被焚數十家。烹若干童子。食其腦髓。以益陽氣。閩人無奈。竊何斬關入院。劫撫臣。畱道臣。闔城震動。閩人亦無奈。竊何造通倭大船。造如許兵器。藏於高樓。橫行狂逞。閩人又無奈。竊何閩人得免竊之劫奪。已爲厚幸。誰敢問其邱山之金。而置一盼哉。且是時賴閩之官。嚴於禁民。閩之民。謹於奉法。而竊之兇橫。始無所挫。九千餘金。不知當日貯於何所。竊能逞威於閩。

省之衆。何爲被搶金於林世吉等數人。傳聞竊之金寶。真與斗齊。方離閩省之日。以筐篋不能盡載。取其粗賤者焚之。經數晝夜。烟燄不息。畱存精細珍寶。分爲八九十槓。每槓十人。擡行尤甚艱苦。行至山東北。京地方分散。槓猶八十餘。擡而每擡四人可舉矣。是竊巧於爲計。以隱匿。故槓先重而後日輕。又敢於捏情以害士民。故誣世吉等搶失。而陰爲己欺隱地爾。夫起元世吉受竊剝膚之害。安能噤口藏身而不出。故突恨之深。而誣之無情。青天白日之下。行魍魎鬼魅之計。其說謊當斬。其在閩剝民殺人。必付市曹。始盡其罪。若閩省撫按。必能爲士民白誣。又必能寬拖欠之追。量處公館之價。毋重因此被虐已久之民也。臣所謂誣人者不徇。以安士民之心者此也。鹽院挈鹽犯。所以清奸蠹。裕邊儲。法紀應然。職掌得聽。操縱。卽福王且不得禁之。何有么靡之戾孟春也。師管潘濟源。二犯爲洛陽之部民。又爲鹽法之罪犯。無與於儀衛司。而孟春爲討令逼奪。則撓法莫甚。御史冠惠文冠。威得行於破柱。乃鹽犯逋逃。籍福府爲之藪。衛弁竊權。取王令如在寄。或福王販賣食鹽之心。正熟於中。欲廣招奸徒。以牟其利。故孟春逢迎賣鹽之意。巧於爲投。方幸得師管等。以遂其私。第嗣是奸人。將充於王之左右。直指將窮於王之牽掣。漸不可長。法令謂何必逮孟春。明正其罪。諭福王還師管。二犯於鹽臣。聽其盡法究處。庶國紀獲伸。奸人知畏。臣所謂撓法者不容。以重憲臣之體者此也。蓋宦官衛弁。不識詩書。不知理法。其心甚狠。其氣颺發而難制。有所舉動。每每違天害人。欺君捍綱。而無所顧忌。實由市棍亡命之徒。蠅趨蟻集。其門爲之句引。奸邪爲之奔走。營算以釀成此患。故宦臣衛弁。虎也。市棍亡命。其傅虎之翼者也。羽翼不除。猛虎何戢。撫按雖日

敵脣禿頤與之爭亦何益矣。如丈田一事。前月奉旨。該撫按官遵照前旨。作速差委經管官。會同本府差官。上緊清丈明白。是皇上明以事權歸之撫按。於本府差官。不過會同。可并約束之者也。及今廉閹時。孟春等黨棍。捕而治之。務殫豕牙。不使滋蔓而難治。此撫按事也。及今正案典刑。與逮閹時。孟春於理。不使奸惡漏網。此皇上事也。必無虐民之左右。而藩府乃安。必鄉紳得訴其桑梓之苦。御史得伸其鋤奸戢暴之威。而天下乃治。則閹時等三惡難容。旦夕稽誅矣。不然。個人皇皇。莫必其命。惡閹可箝鄉紳之口。小弁可絀御史之法。時事安知其所終哉。伏乞聖明採納施行。

萬歷四十三年正月二十四日

題爲按學二臣覆疏。意原惜才。謹進維法之說。以祈聖斷事。臣竊謂國家之法。有可因人而寬之者。何樂乎不寬之。有不必因人而太寬之者。亦何樂乎太寬之。法可寬而不寬。則索瘢爬垢。天下無全人。法不必太寬而太寬。則徇意潰防。朝廷無成憲。雖今天下人。鮮虛心事。求觴勝。議論時見。盜起。處法無妨調停。然必於調停之中。不失乎懲創之意。毋致廢往法而蕩然無存。斯曲全愛惜人才之心。而大臣所爲妙於持衡耳。先年應天等處。按臣荆養喬。無疏請病。拂衣徑歸。臣曾有疏糾正。已而署院以降俸題參。臣又曾有疏駁爭。是擅離職役之處分。固未有定矣。若督學御史熊廷弼之去。以養喬殺人媚人之參也。都察院之勘廷弼。亦以養喬殺人媚人之參也。勘議一行。爭者四起。朝端幾成闕市。總憲因以不能安其位。隨經應天巡按徐應登。勘過題報。其查覈甚明。其衡量甚當。羣情翕服。不聞有間言者。然第論事理也。而處分別

在都察院也。近日都察院查據題覆。結已定之公案。用盡一片苦心。於養喬之言出自疑。於廷弼之勘因人疑。點綴已明。於養喬之貞廉。愆慎於廷弼之嚴肅。公明獎許各肖。仰稟皇上省斷。令二臣偕奔往郟。並與起任。以難得之人才。當搏擊之風會。愛惜之惟恐或傷。保全之寧從寬政。大臣用心。自宜如此。第果真殺。人媚人。果非殺。人媚人。勘中之事也。養喬之貞廉。愆慎。廷弼之嚴肅。公明。事外之才品也。論事而因。及某品何如。某才何如。不掩二臣本來之面目也。置勘事而謂某只論其品。某只論其才。是混二臣得失之分數也。況養喬當日題參降俸。尙未妥協。尙未得旨乎。昔抱病尙書李楨。賢者也。一徑去而不得免於閑住。被言科臣劉道隆。亦賢者也。一徑去而不得免於降級。況今日言嚴擯去之禁者數數矣。若冒禁之不論。而以品爲辭。豈擅去之法。專爲無品者設耶。臣深知都察院惜才之心。亦深然其起任之說。亦不敢堅執。謂當從李楨。劉道隆。重處之例。第因養喬疏註而去。如道臣張九德等。尙有其人。九德等未與昭雪。按臣先已脫然。則九德等之心不服。昔日之議降俸。猶謂擅去非法。今明知擅去。而起任之外。略不示懲。寬而又寬。法守盡廢。則昔日署院之諸臣不服。臣深願諸臣以法相成。故欲於調停之中。存懲創之意。毋使天下人謂事當其難。遂置法紀於不問爾。夫法。國家之法也。都察院。行法之衙門也。持議論之人。以平心論人。使都察院得行其法者也。故言者不以勝心。掣人之肘。行者不以遷就。心。仇國之法。庶兩得之。方今章疏留中。臣子請告之情。多不得遂。第自便之念。常易縱。而難操。若不以法隄防之。不止也。伏乞皇上採納裁斷。卽日批發都察院覆疏。毋或因臣言而少稽可矣。臣可勝悚息待命之至。

萬曆四十三年正月三十日

郭給諫疏稿 卷一

郭給諫疏稿跋

人臣事闡主難。事英主尤難。誼之於文帝。徵之於太宗。可謂兩相得而兩相失。故前席鬼神之對。十思十漸之奏。通達國體。使萬世知君臣之義者。亦徒付之空談。事英主信難矣。今郭公給諫與余同籍。已又同官吉州。剖疑決滯。人莫敢干其三尺。以平理奏最。入拜諫垣。先後叩闈。數十百疏。訟士冤。摘親藩。斥惡瑯。抑邪弁。言粵重稅。一切建白。皆侃侃切於事情。最後封還內降一疏。如批逆鱗。竟以遷客行。公怡然就道。略無幾微悒鬱。見於顏面。歸而杜門卻掃。一以澹泊狷介爲心。然時時顰眉。國事有漆室杞人之憂。予叩其疏草。焚者半。存者半。夫士君子挈綱執憲。雖非必屑屑封事之陳。以爲勝。然一腔熱血。瀝之尺幅中。以存國體。障狂瀾。晰賢奸。忠佞之辨。睹輿替利弊之原。世道攸繫。蓋綦鉅矣。昔韓琦爲諫官。所存諫草。欲聚而焚之。以爲無以彰人主容諫之美。乃傳七十餘章於世。公之意無乃是歟。今上聖明在宥。一旦轉圜。止輦。賜公以環。俾得出入禁闈。則公之所以報國者。出誼徵之右。詎直以奏議稱已也。年弟潘濬識。

右郭給諫疏稿二卷。明南海郭尙賓朝諤撰。按先生事迹。附見明史翟鳳紳傳中。是書其官刑科給事中時疏稿。萬歷四十一年五月初十日。至四十三年正月三十日。立朝曾未三年。卽謫江西布政司檢校而去。卷中多言明季秕政。覽之令人髮指。其如回天之不易。何。當是時。言路交攻。聚訟盈廷。入主出奴。是非不明。毀譽無憑。遂至釀成搢紳之禍。而國運隨之。未可謂非諸賢護前之所致。而先生殆無是也。卽如四十年七月二十二日。疏言粵地可憂。防澳孔亟。宜鋤亂本。以固疆圉。事時督兩廣者張鳴岡也。據沈德符野獲編。鳴岡覆疏。言澳夷近狀。謂澳中私畜倭奴。且私築牆垣。抗殺官兵。倭已有妻子廬舍。今不亡一矢。逐名取船。押送出境。數十年澳中之患。一旦祛除。惟倭去而夷留。議者有謂必盡驅逐。須大兵臨之。以弭內憂。有謂濠鏡內地不容盤踞。今移出浪白外洋。就船貿易。以消內患。然濠鏡地在香山。官兵環守。彼日夕所需。咸仰給於我。一懷異志。卽扼其喉。不血及而制其死命。若移出浪白。大海茫茫。無涯。番船往來。何從盤詰。奸徒接濟。何從堵截。句倭釀釁。莫可問矣。或者彼中情形。實實如此。其說則與原疏鑿柄之極。而先生四十二年五月十五日。疏言督臣守不可誣。宜儆奸邪。以安疆圉。事則謂臣幸總督兩廣張鳴岡之賢。斯能令民之有恃而無恐。又謂臣知鳴岡。大非侵兵餉貪夷貨取珠寶之人。又謂鳴岡嚴禁餽遺。清沃耗羨。於澄清粵東吏治。最爲得力。於前覆疏鑿柄之言。絕無芥蒂。其亦加人一等者歟。據阮通志。是書與文集並藏於家。殆未付剞劂。故屈氏廣東文選。溫氏粵東文海。兩書中奏疏頗多。均未錄其一字。道光庚寅。修南海縣志。其後人始緘寄局中。而文集不可問矣。譚玉生廣文。適任分纂之役。亟與借鈔。原無卷

郭給諫疏稿跋

數。技。釐。爲。二。卷。校。勘。刊。刻。以。永。其。傳。乙。巳。清。明。前。二。日。後。學。伍。崇。曜。謹。跋。



泰 熙 錄

王 文 祿 錄

本館據百陵學山
本排印初編各叢
書僅有此本

泰熙錄

大學士高拱一本議處科目人才以興治道事。臣惟國家之用人皆欲砥礪名節。建立事功。以共成熙平之治。非徒以一日之短長。遂爲終身之定例。而故有所抑滯於其間也。今布列中外。自州縣正官而上。大較皆科目之人。而科目分數。進士居其三。舉人居其七。然所謂進士舉人者。亦惟假此爲網羅之具。以觀其他日之何如。而非謂此必賢于彼也。國初進士舉人。槩用其舉人登八座。爲名臣者。難以一二計。自後進士偏重。而舉人甚輕。至于今則極矣。其係進士出身者。則衆向之。甚至以罪爲功。其係舉人出身者。則衆薄之。甚至以功爲罪。上司之相臨。同列之相與。炎涼盈面。可鄙可羞之甚。而皆不自顧也。至于保薦。則進士未必皆賢。而十有其九。舉人未必皆不賢。而十曾無其一也。至于陞遷。則進士治績之最下者。猶勝于舉人。治績之最上者。也。卽幸有一二與進士同陞。然要其後日。則進士之俸多。而陞官又高。舉人之俸少。而陞官又劣也。若夫京堂之選。則惟進士得而舉人。不復有矣。其偏如此。遂使進士氣常盈。舉人氣當怯。盈者日驕。每襲取而寡實。怯者日沮。率墮志而恬行。以故舉人皆不樂仕。苟年力尙壯。學未甚荒者。皆相與遷延冀倖一第。直至年邁學荒。淪落已甚。然後出而就選。以爲姑用了事。云爾。間有一二壯年從仕者。又皆爲貧之故。求溫飽者也。若是而欲其有爲。胡可得哉。及其不能有爲。則又曰。此輩果不堪用。然不知乃用人太偏所致。而非其本體果皆如此也。夫崇尚進士。纔三分耳。而

又使之驕。棄卻舉人。已七分矣。而皆使之阻。則天下之善政。誰與爲之。而民生奚由得安也。臣愚以爲欲興治道。宜破拘攣之說。以開功名之路。凡舉人就選者。初只以資格授官。授官之後。則惟考其政績。而不必問其出身。進士而優。則先之。苟未必優。卽後于舉人無妨也。舉人而劣。則後之。苟未必劣。卽先于進士無妨也。吏部自行體訪。但係賢能。一例陞取。不得復有所低昂。仍行都察院轉行各該撫按官。務除去舊套。但係賢能。一例保薦。亦不得復有所低昂。如舉人官未經保薦。而陞取數多者。撫按官以不及論。其旣陞取之後。又惟論其政績。一例推轉。舉人之俸。不必加深。進士之官。不必加美。若果才德出衆。則一例陞爲京堂。卽上至部卿。無不可者。如此則拘攣之說破。而功名之路開。苟非至不肖者。必不甘于自棄也。至于舉人就選之時。又必稽其年貌。五十以上者。授以雜官。不得爲州縣之長。蓋州縣之長。責任艱重。須有精力者。乃可爲之。彼其精力旣衰。胡可爲哉。如此則人皆趨可爲之時。以赴功名之會。而甘于淪落者寡矣。夫舉人與進士並用。則進士不敢獨驕。則舉人皆益自效。而善政亦必多。卽未必人人皆然。而十分之中。少亦有可六七。固已過半矣。善政多。則民安。民安。則國可富。而教化可興。熙平之治。可庶幾望也。臣誠愚昧。所以爲國謀者如此。伏惟聖明裁斷。勅下吏部施行。天下幸甚。奉聖旨。祖宗用人。原不拘資格。近來偏重太甚。以致人無實用。事功不興。覽卿奏。具見經濟宏猷。於治道人才。大有裨益。依議着實舉行。吏部知道。隆慶五年七月初一日。謄字訛。乞對真稿校正。

海鹽草莽小臣王文祿。伏讀聖上嘉納輔臣議處科目人才。以興治道疏。仰見君聖臣賢。天地交泰。雍熙

太平之立致云。聖旨曰。祖宗用人。原不拘資格。卽明揚無方也。曰。近來偏重太甚。以致人無實用。事功不興。監流弊。宣大公也。曰。覽卿奏。具見經濟宏猷。于治道人才。大有裨益。依議着實舉行。揚善用中也。夫中也者。大公無偏也。列聖授受。曰允執厥中。由人稟天地之中以生也。奈偏匪中。炎涼低昂。盈怯驕阻。均失矣。不有是疏。曲盡情僞。洞徹肺肝。態狀畢昭。纖毫莫遁。何以感動天聽。挽回世風哉。凡幸際昌期者。當竭中心之忠。養浩然中正之氣。不惜命。不愛錢。誓不負聖君賢輔之懇激。庶不忝天地父母之生成。設甘自輕。殃民蠹國。非夫也。猛省勉旃。文祿求志。苟全罔干利祿。乘彜同好。速梓廣傳。繼讀修邊政處。卑官二疏。大忠至仁之心。無窮。直欲野無遺賢。萬國咸寧。華夷大一統爾。前代賢輔。能企乎。謹約熙平交泰義。曰泰熙錄。入學山中垂監云。